

四庫全書

集部

欽定四庫全書

集部

藥城後集卷一至四

詳校官庶吉士_臣胡鈺

檢討_臣何思鈞覆勘

總校官進士_臣朱鈐

校對官助教_臣胡予襄

謄錄監生_臣陳執中

欽定四庫全書

藥城後集卷一

宋 蘇轍 撰

詩七十首

次韻子瞻感舊

還朝正三伏一再趨未央久從江海游苦此劍佩長夢

中驚和璞起坐憐老房

子瞻夢中見人誦詩云度數形名本偶然破琴今有十三弦此

生若遇邪和璞始信秦寧是響泉因作破琴詩以記之

為我忝承轄真身願并涼

子瞻每欲為國守
邊顧不敢請耳

此心一自許何暇憂陟岡早歲發歸

念老來未嘗忘淵明不久仕黔婁足為康家有二頃田
歲辦十日糧教教諸子弟編排舊文章辛勤養松竹遲
暮多風霜常恐先著鞭獨引社酒嘗火急報君恩會合
心則降

次韻題畫卷四首

山陰陳迹

卧對邨人氣已真晚依邱壑更無倫不須復預清言侶

自是江東第一人

逸少知清言之害然蘭亭記亦不免慕清言耳

雪溪乘興

亟往遄歸真曠哉
聾人不信有驚雷
雖云不必見安道
已誤扁舟犯雪來

四明狂客

失脚來遊九陌塵
故溪何日定抽身
便同賀老扁舟去
已笑西山鄭子真

西塞風雨

雨細風斜欲暝時
凌波一葉去安歸
遙知夜宿蛟人室
浪卷波分不著衣

直略切

送姪邁赴河間令

老去那堪用恩深
未敢歸誰能告民病
一一指吾非爾
赴河間治無嫌野老
譏仍將尺書報
勿復問從違

次韻門下呂相公車馬跡學

未識吾君龍鳳章
諸儒望幸久南庠
輦回原廟初移蹕
鷺集西廡已著行
執爵稍前疑問道
獻琛不日數來王

從官始悟熙寧意遺我親臨見肯堂

傅銀青挽詞二首

名自烏臺發恩從鳳沼深鹽梅和衆口金玉比誠心澹
泊平生事彌留一病侵遺言自無憾朝野為沾襟

其二

丹旄國西門茅廬濟水深官清貧似舊名重沒猶存臺
閣傳遺懿交遊拭淚痕君恩不改故延賞遍諸孫

大雪三絕句

金匱要略卷一
閏歲窮冬已是春當寒卻暖未宜人陰風半夜催飛霰
稍淨天街一尺塵

元冥留雪付勾芒桃李雖憂麥未傷膏澤較遲三十日
問天此意亦茫茫

連歲金明不見冰上春風雪氣稜稜臺中曾奏五行傳
到此施行愧未曾

和王晉卿都尉荼蘼二絕句

春到都城曾未知楸花時見萬年枝多情賴有王公子

解剪金槃寄所思

春來未曾見花但於禁中時見楸花耳

後圃茶縻手自栽清於芍藥醺於梅舊來詩客今無幾

三嗅馨香懶舉杯

次韻門下呂相公同訪致政馮宣猷

懶從朝謁事驂駢此去高眠罷倒衣詔許敲門訪耆舊

天教築室俟來歸

石公熙載舊宅張氏頃加修完公得之以成歸計類非偶然者

肩輿

尚肯追春色

公來春將往洛中看花

鼓缶何妨傲夕暉所至成家

即安隱武昌誰乞釣魚磯

滕達道龍圖挽詞二首

才適邦家用學非章句儒遭逢初莫測流落一長吁大
節輕多難深言寃遠圖收功太原守談笑視邊隅

其二

南竄逢公弄水亭

公時守池

北歸畱我闔閭城壯年不見日

千里餘論猶驚敵萬兵簡策何人知造膝邊防觸處疎
先聲傷心繫舸城東地目斷安知有死生

魯元翰中大挽詞二首

遺直誦家聲持心本至誠何勞求覈察所至自安平氣
象餘前輩才華屬後生飛騰看諸子相繼亦公卿

其二

十年初見范公園知與錢塘結弟昆樂易向人無不可

疎慵憐我正忘言南遷卻返逢北渡遠聘相過適近藩

無復放懷譁笑語挽詩空寄淚潺湲

子瞻兄始與元翰皆倅杭州及自彭

城還止都門寓居范景仁東園元翰時來相過予始識之其後南還元翰出守洛州及奉使契丹元翰復守滑臺

皆接從容

者久之

贈司空張公安道挽詞三首

道廣中無競才高治不煩安心本篤靜憂世亦時言壽
考同儕盡經綸故事存猶應門下客微論記根原

其二

孤高出世學豪邁謫仙人早歲猶和俗中年自識真定
餘時發照塵盡四無隣聞道騎箕尾還應事玉宸

其三

西蜀識公初南都從事餘一言知我可久好復誰如學

術留元歎家聲付伯魚霜天近生日聞挽重轅轂

蔡州任氏閼世堂

朱君長桐鄉死食桐鄉社吏民安君德君亦愛其下遺
言於斯葬存沒勿相捨自知得民深千歲誰似者任君
治新息寬惠洽鰥寡疆梁順教詔桴鼓不鳴野三年去
復還園木栽拱把居人敬閭巷禽鳥依屋瓦蒼然百尺
檜直幹任大厦相要勿剪伐令尹昔所舍

次韻子瞻和淵明飲酒二十首

我性本疎懶父母強教之逡巡就科選速比年少時幽
憂二十年懶性祇如茲偶然踐黃闥俯仰空自疑乞身
未敢言常愧外物持

其二

人言性本靜不必林與山世雖有此理知誰非妄言自
我作歸計于今十餘年低回軒冕中此語愧虛傳

其三

世人豈知我兄弟得我情少年喜文章中年慕功名自

從落江湖一意事養生富貴非所求寵辱未免驚平生
不解飲欲醉何由成

其四

秋鴻一何樂空際乘風飛秋蟲一何憂壁間終夜悲憂
樂本何有力盡兩無依物生逐所遇久行不知歸少年
氣難回老者百事衰聊復沃以酒永與狂心違

其五

昔在建成市鹽酒晝夜喧夏潦恐天漏冬雷知地偏妻

挈日告我胡不反故山一來朝廷上七年不知還有寓
均建成且志昔日言

其六

夢中見百恠一一皆謂是醉中身已忘萬事隨亦毀此
心不應然外物妄使爾安心十年後此語知非綺

其七

開卷觀古人誰非一世英骨肉委黃壚泯滅俱無情
憧憧來無盡擾擾相奪傾驚雷震朱夏鮮能及秋鳴得酒

且酣飲問誰逃死生

其八

明月出東牆萬物含餘姿孤蟬庇繁蔭衆鳥棲高枝解
衣適少事捫腹知亡奇朝與羣動作暮復何所為此時
不自有日出還受羈

其九

尺書千里至輟食手自開將卜東南居故鄉非所懷勿
言湖山美永與平生乖鴻鴈秋南來及春思故棲蛟龍

金史四庫全書
卷一
乘風雲既雨反其泥兄弟通四海叩門事雖諧直道竟
三黜去國終恐迷何如自衛反闕里從參回

其十

羌虜忘君恩戰鼓驚四隅邊候失晨夜驛騎馳中途詔
書止窮征諸將守來驅敵微勢可料師競力無餘防邊
未云失髮懷愧安居

其十一

修己以安人嗟古有此道平生妄謂得忽忽恨衰老年

來亦見用何益世枯槁逡巡事朝謁出入自媚好報君
要得人被褐信懷寶斯人何時見即上歸耕表

其十二

春旱麥半死夏雨欣及時出郊眎禾田父老有好辭秋
陰結愁霖似欲直敗茲冥冥人天際影響良不疑精誠
發中禁愍默非有欺雞號日東出乃令民信之

其十三

天厨釀冰池搖蕩畏出境年衰雜羸病一醺百不醒鸞

臺異諸曹有政非簿領頽然雖無謫因謝出囊頽回首
愧周行羣英粲彪炳

其十四

淮海老使君受詔行當至當官不避事無事輒徑醉平
生自相許兄先弟亦次東南豈徒往多難嫌暴貴白首
六卿中嚼蠟那復味

其十五

去年旅都城三月不求宅彼哉安知我爭掃習禮迹三

已竟無怨心伏鷲鳥百無私心如丹經患髮先白功名
已不求餘事復何惜

其十六

家居簡餘事猶讀內景經浮塵掃欲盡火聚行當清
晨委羣動永夜依寒更低帷闕重屋微月流中庭依松
白露上歷坎幽泉鳴功從猛士得不取兒女情

其十七

南方有貧士狂恠如病風垢面髮如葆自汙屠酒中導

我引河水上與崑崙通長箭挽不盡不中無尤弓

其十八

清秋九日近菊酒皆可得永愧陶翁饑雖饑心不惑懷
忠受正命賦命本通塞斯人今苟在可與同事國惜哉
委荆榛忍饑長默默

其十九

我友二三子兼有仕未仕青松出林秀豈獨私與已歛
然不求人而我自壘恥臨風忽長鳴誰信日千里江行

眎漁父但自正綱紀持綱起萬目魴鱗皆可止老成日就衰所餘殆難恃

其二十

諸妄不可賴所賴惟一真內欲求性命油然反清淳外將應物化致一常日新商於四父老攜手初逃秦翻然感漢德投足復踐塵出處蓋有道豈為諸呂勤嗟我千歲後澹然與之親還將山林姿俛首要路津囊中舊時物布衣白綸巾功成不歸去愧此同心人

次韻子瞻道中見寄

兄詩有味劇雋永和者僅同如畫影短篇泉冽不容挹
長韻風吹忽千頃經年淮海定成集走書道路未遑請
相思半夜發清唱醉墨平明照東省

詩到適在省中

南來應帶

蜀岡泉西信近得蒙山茗出郊一飯歡有餘去歲此時
初到潁

郊祀慶成

盛禮彌三祀初元正七年祭兼天地報儀自祖宗傳講

義金華久

近有旨講讀官訓釋祖宗
祠故事十五條日陳於前

齋心玉食鮮秋

成通四海廩實到窮邊

今秋諸道皆奏豐稔而
陝西河東極邊尤甚

塵卷跳

疆寇

西羌人寇環州
邊吏邀擊敗去

琛來渡海船

高麗使前十日
到闕預觀大禮

人和

神亦答物備禮誠全廟室開深觀郊丘對廣園翠帷新

祕殿寶仗溢通塵周冕裘繒儉

周禮大裘而冕以祀天有
司欲為羔裘度用百羔上

以其害物以

唐車保介便

五輅有貞觀款志進
退安重奕世所寶

導前多

舊德迎拜或華顛薦潔求陰燧馳誠寄燎烟垂精粲星

斗望秩遍山川降輅追前躅回班戒弗虔徹網深屈體

屏蓋切承天

上至大廟門降輅步入齋殿至郊壇止百官回班仍去黃道褥三事皆循祖宗故事

而去繼特出上意

懈谷灰初應

緹室吹灰久廢不講近太史考求遺書復修其法

扶桑

日欲躔旌旗逐風轉歌舞送天旋簾啟瞻宸極雞號識

漏泉矜愚開罪罟釋欠靖民編樂作波翻海書行箭脫

弦東朝歸福胙南極本高仙有道知難犯無私每得賢

勛勞就聖德謙畏絕私權治道初無象神功竟莫宣下

臣叨進玉隨見頌誠然

臣於景靈郊丘實進玉幣

次韻姚道人二首

西山學採薇東坡學者羹羹昔在建成市豈復衣冠情朋
友日已疎止接盲趙生嗇智狗所安元氣賴以存時於
星寂中稍護亂與昏河流發九地欲挽升天門枉用十
年力僅餘一燈溫老病竟未除驚呼欲狂奔何日新雨
餘得就季主論

高人隱陋巷至藥初無方心知無生妙運轉開陰陽才
如凌雲松豈受尺寸量氣如幽谷蘭時送清風香嗟我
本病肺寒暑隨翕張丹砂苦落落青春去堂堂清詩墮

雲霧至音叩琳瑯山海信多士世俗非所望遠遊居臨
安間出從諸王他年解冠佩共遊無邊疆儀麟既委照
永謝過隙光

次韻子瞻上元扈從觀燈二首

虜去邊城少奏章雪殘中禁罷焚香都人知有新年喜
爭看珣輿金鳳凰

春來有意乞歸耕足痺三年久未平

頃奉使契丹墜馬傷足已三年矣

忽記上元鑾輅出起聽前殿曉鐘聲

蔡州壺公觀劉道士

并引

元祐八年七月彭城曹煥子文至自安陸為予言過
淮西入壺公觀觀縣壺之木木老死久矣環生孫藥
無數聞有老道士劉道淵年八十七非凡人也謁之
神氣甚清能言語服細布單衣縫補殆遍壁間題者
多以不易衣為美煥問其意道淵悵然曰此故淮西
守歐陽永叔所贈也世人稱永叔工文辭善辯論忠
信篤學而已君知是人竟何從來耶公與我有夙契

且齊年也昔將去吾州留此以別吾服之三十年嘗
破而補之矣未嘗垢而澣也比嘗得其訊吾亦去此
不久矣煥聞之愕然莫測徐問其故皆不答予少與
兄子瞻皆從公遊究觀平生固嘗疑公神仙天人非
世俗之士也公亦嘗自言昔與謝希深尹師魯梅聖
俞數人同遊嵩高見薛書四大字於蒼崖絕澗之上
曰神清之洞問同遊者惟師魯見之以此亦頗自疑
本世外人今聞道淵言與曩意合因作詩以示公子

裴叔弼

思穎求歸今幾時布衣猶在老劉師
龍章舊有世人識蟬蛻惟應野老知
昔葬衣冠今在否近傳音問不須疑
曾聞圯上逢黃石久矣留侯不見欺

大行太皇太后挽詞二首

內治隆三世尊臨極九年神孫克負荷
大業付安全有道華夷靖無心怨惡悛
和熹盛東漢從此不稱賢

其二

約己心全小寬民德有餘外家恩澤少先后禮容虛有司

每以獻章太后故事為請德音輒深自菲薄不敢當而止原廟因前室有司將築神宗皇帝神御

有詔自處治隆頃歲將受冊寶當御前殿中朝避冊書謙避不欲遂退即後殿而

已功名不勝紀四謚歎猶疎近以四謚進呈上歎曰太皇太后盛德豈四謚所能

盡

次韻姚道人

道人偶許俗人知法喜非妻解養兒夜久金莖添沆瀣
室虛寶月映琉璃遠來醉俠忽忽返近出詩仙句句奇

獨恠區區踐繩墨相逢未省角巾歌

次韻石芝

并引

子瞻昔在黃州夢遊人家井間石上生紫藤枝葉如
赤箭主人言此石芝也折而食之味如雞蘇而甘起
賦八韻記之元祐八年予與子瞻皆在京師客有至
自登州者言海上諸島石向日者多生耳海人謂之
石芝食之味如茶久而益甘海上幽人或取服之言
甚益人客以一籃遺子瞻遂次前韻

雞鳴東海朝日新光蒙洲島霧雨勻一晞石上遍生耳
幽子自食無來賓寄書乞取久未許箬籠蕉囊海神戶

戶止也左傳
屈陽戶之

一掬誰令墮我前無為知我超諸數此身

不願清廟瑚但願歸去隨樵蘇龜龍百歲豈知道養氣
千息存其胡塵中學仙定難脫夢裏食芝空酷烈中山
軍府得安閒更試朝霞磨鏡鐵

故樞密簽書贈正議大夫王彥霖挽詞二首

試吏有能名升臺擅直聲雄飛極九載修路止三城壯

志方凌厲遺書忽歎驚老人殊可念白首泣新塋

其二

傾蓋晚相親東西省戶鄰聽君占諫草繼找出詞綸京
尹聲初決樞庭迹尚新邯鄲炊未熟榮謝陽逡巡

讀史六首

留侯決成敗面折愧周昌垂老名高叟鴻鵠自高翔
其二

諸呂更相王陳平氣何索千金壽絳侯劉宗知有託

其三

賈生料吳楚竟斃大梁城一身不自保痛哭空傷生

其四

桓文服荆楚安取破國都孔明不料敵一世空馳驅

其五

安石善談笑揮麈卻符秦妄起并吞意終殘吳越人

其六

江河浪如屋要須滄海容可憐狄仁傑猶復負婁公

和子瞻雪浪齋

謫居杜老嘗東屯波濤遶屋知龍尊門前石岸立精鐵
潮汐洗盡莓苔昏野人相望夾水住扁舟時過江西村
窓中縞練舒眼界枕上雷霆驚耳門不堪水恠妄欺客
欲借楚些時招魂人生出處固難料流萍著水初無根
旌旗旋逐金鼓發蓑笠尚帶風雨痕高齋雪浪卷蒼石
北叟未見疑戲論激泉飛水行亦凍窮邊臘雪如翻盆
一杯徑醉萬事足江城氣味猶應存

次韻子瞻生日見寄

日月中人照與芬心虛慮盡氣則薰彤霞點空來羣羣
精誠上徹天無雲寸田幽闕煥不焚眇眇中外絳錦紋
冥然物我無復分不出不入常氤氲道師東西指示君
乘此飛仙勿留墳茅山隱居有遺文世人心動隨蚩蚊
不信成功如所云蚤夜賓餞同華勛爾來僅能破魔軍
我經生日當益勤公稟正氣飲不醺梨棗未實要鉏耰
日云暮矣收桑粉西還閉門止紛紛憂愁真能散淒淒

萬事過耳今不聞

登真隱訣云日中青帝曰
照龍輶其夫人曰芬豔嬰

蹇師嵩山圖

并引

葆光法師蹇君未嘗至嵩山欲往遊焉元祐九年春
磐桓都下得古畫一幅以示其客客曰此嵩山圖也
予昔嘗遊焉峯嶺徑遂觀刹皆是君喜曰此將以導
予也吾昔熙寧中自陳之洛往來皆出嵩少之間時
方重九與偕行者約曰與予於此登高乎今筋力尚
強可以一往異日復至或不能矣今年三月以罪出

守汝州聞此州在嵩少之陽登城北望可以盡得其
勝君何時為此遊吾將舉酒與子相望雖不能同亦
庶幾焉系之以詩曰

峻極登高二十年汝州回望一依然君行亦是高秋後

試覓神清古洞天

神清洞
事見上

望嵩樓

在汝州

連山鄣吾北二室分西東東山幾何高不為太室容西
山為我低少室見諸峯臨軒一長歎隱見由所逢試問

山中人二室竟誰雄雄雌久已定分別徐亦空可憐汝
陽酒味與上國同遊心四山外寄適杯酒中

思賢堂

楊公守臨汝俛仰八十載推遷城市非散落篇章在外
物固難必清名竟安賴孤亭石洲渚斜日到冠佩飛翔
棟宇回滉蕩波流對稍存楸梧高大翦菰蒲穢遺編訪
諸子翠石補前廢吏民亦潛然未替甘棠愛

阻風

自汝遷筠八月過真州
江漲倍常歲而風不順

大水蔑洲浦牽挽無復施我舟恃長風風止將安為塌然
委積水坐被弱纜維市井隔峯嶺食盡行將饑長嘯呼
風伯厄窮豈不知蓬蓬起東南旗尾西北馳所望乃大
謬開門訊舟師舟師掉頭笑沿沂要有時沂者不少息
沿者長嗟咨飄風不終日急雨常相隨雨止風亦止條
條弄清漪我言未見信君行自見之

次韻子瞻遊羅浮山

客迷墮澗逢玉京雲行天喬風號鳴暗中過盡石髓滑

驚喜觀闕朝霞明東坡南去類此客擠者力盡非求生
偶然瀕海少氛氣復有福地容躬耕諸侯歷聘謝魯叟
茅簷燕坐師老彭天樞旋結日珠重人寰下視鴻毛輕
俗緣漸覺冰雪解元氣乍復蛟虬獐遠遊脫屣入葢竹
初怪長史留家庭後來玉斧小兒子亦入真誥參仙經
試令子弟學諸許還家不用劔閣銘洞天聞亦有圖籍
但恐未免如公卿此心願與世無事不願與世平不平

次韻子瞻江西

許君馬老共一邦
西山斷處流蜀江
誰令十載重渡瀧
灘頭舊寺晨鐘撞
亂流赤脚記淙淙
道俗自謂丹霞龐
便令築室修畦疇
往還二老筇一雙

予與筠州聰長老有十年之舊

雨中遊小雲居

賣酒高安市
早歲逢五秋
常懷簡書畏
未暇雲居遊
十載還上都
再謫仍此州
廢斥免羈束
登臨散幽憂
鄉黨二三子
結束同一舟
雨餘江漲高
林薄煩撐鉤
積陰荐雷作
兩山亂雲浮
雨點落飛鏹
江光濺輕漚
笑語曾未

畢風雨遽誰收
舟人指松檜古剎依林邱
老僧昔還住
晚飯迎淹留
食菜吾自飽
饋肉煩賢侯
嚴城迫吹角
歸棹隨輕鷗
聯翩閱村塢
燈火明譙樓
肩輿踐積甃
塗潦分潛溝
居處方自適
未知厭拘囚

藥城後集卷一

欽定四庫全書

藥城後集卷二

宋 蘇轍 撰

詩七十首

次韻子瞻上元見寄

誰憐東坡老獨看南海燈故人隱山麓燕坐銷牀稜人
生天運中往返成廢興炎起爨下薪凍合瓶中冰賴有
不變處寂如方定僧建成亦巖邑燈火高下層頭陀舊

金史卷一百一十五
卷二
所識天寒髮鬢髻問我何時來嗟哉谷為陵幸此米方
賤日食聊一升夜出隨衆樂舖糟共騰騰

次韻子瞻連雨江漲二首

南過庾嶺更千山
蒸潤由來共一天
雲塞虛空雨翻瓮
江侵城市屋浮船
東郊晚稻須重插
西舍原蠶未及眠
獨棹扁舟趁申卯
米鹽奔走笑當年

客到炎陬喜暫涼
江吹虛閣雨侵廊
回看野寺山溪隔
卧覺晨炊稻飯香
荔餉深紅陋櫻棗
桂醅淳白比琳琅

恩移嶠北應非晚未省南遷日月長

次韻姪過江漲

陰淫夏為秋雨暴溪作瀆缺防舊通市流潦幾入屋雖
幸廩粟空猶惜畦蔬綠鹿駭不擇音鴻羈分遵陸室誚
曾子還城謳華元劍中情久岑寂外物競排感設心等
一慈開懷受諸毒道力雖未究游波偶然伏糧須三月
聚父要七年蓄君恩許北還從此當退縮

亡嫂靖安君蒲氏挽詞二首

家風足圖史婦德儼蘋蘩湯沐從夫寵冠衣席弟恩克
家傳衆子有後慶多孫追養心何極增封禮尚存

其二

宦遊非不遂流落自龕疎宗黨半天末存亡驚素書佳
城東嶺外茂木故阡餘遙想千車送臨江涕滿裾

寄題武陵柳氏所居二首

天真堂

宦遊閱盡山川勝歸老方知氣味真歌哭不移身自穩

往還無間語尤親永懷前輩無因見猶喜諸郎有此人
千歲展禽風未改不加琯琢世稱珍

康樂樓

邑居欲盡溪山好不作層樓無奈何巖谷滿前收蠟屐
漪漣極目卷漁蓑安心已得安身法樂土偏令樂事多
千里筠陽猶靜治還家一笑定無他

筠州州宅雙蓮

綠蓋紅房共一池一雙遊女巧追隨鏡中比並新粧後

風際攜扶欲舞時
露藥暗開香自倍
霜蓬漸老折猶疑
殷勤畫手傳真態
道院生綃數幅垂

奉同子瞻荔支歎

蜀中荔支止嘉州
餘波及耆半有不
稻糠宿火却霜霰
結子僅與黃金侔
近聞閩尹傳種法
移種成都出巴峽
名園競擷絳紗苞
蜜漬瓊膚甘且滑
北遊京洛墮紅塵
箬籠白曬稱最珍
思歸不復為蓴菜
欲及炎風朝露勻
平居著鞭苦不早
東坡南竄嶺南道
海邊百物非平生

獨數山前荔支好荔支色味巧留人不管年來白髮新
得歸便擬尋鄉路棗栗園林不須顧青枝丹實須十株
丁寧附書老農圃

次韻子瞻梳頭

水上有車車自翻懸雷如線垂前軒霜蓬已枯不再綠
有客勸我抽其根枯根一去紫茸茁珍重已試幽人言
紛紛華髮何足道當返六十過去覓近有道士相教拔
白後以水火養之
當不復生
故以為答

勸子瞻修無生法

除却靈明一一空年來丹竈漫施功掌中定有菴摩在
雲際懸知霧雨濛已賴信心留掣電要須淨戒拂昏銅
誰言逐客江南岸身世雖窮心不窮

石盆種菖蒲甚茂忽開八九華或言此華壽祥也
遠因生日作頌亦為賦此

石盆攢石養菖蒲沮如沙泉韭葉鋪世說華開難值遇
天將壽考報勤劬心中本有長生藥根底暗添無限鬚

更爾屈蟠增瘦硬他年老病要相扶

子瞻和陶公讀山海經詩欲同作而未成夢中得
數句覺而補之

此心淡無着與物常欣然虛閑偶有見白雲在空間愛
之欲吐玩恐為時俗傳逡巡自失去雲散空長天永愧
陶彭澤佳句如珠圓

成都僧法舟為其祖師寶月求塔銘於惠州還過
高安送歸

少年能講大乘經法施堂中不出局為許先師傳後世
徑從西海集南溟忘身直犯黃茅瘴滿意初成白塔銘
寄我淚痕歸萬里遙知露滴澗松青

東西京二絕

親祀甘泉歲一終屬車徐動不驚風宓妃何預詞臣事
指點譏訶豹尾中

犀箸金槃不暇嘗更須石上搗黃梁數錢未免河東舊
不識前朝大練光

唐相二絕

楊王滅後少英雄
猶自澄思却月中
已得惠妃歡喜見
方頭笑殺曲江公

朝中寂寂少名卿
晚歲猜氣益橫心
怕無鬚少年士
可憐未識玉奴兄

寓居六詠

手植天隨菊
晨添苜蓿盤
叢長憐夏苦
花晚怯秋寒
素食舊所愧
長齋今未闌
殷勤拾落葉
眼暗讀書難

其二

山丹炫南土盈尺愧西京所至曾無比知非浪得名未
須求別種尚欠剝繁英行復春風度天涯眼暫明

其三

隣家三畝竹蕭散倚東牆誰謂非吾有時能惠我涼雪
深聞毀折風作任披猖事過還依舊相看意愈長

其四

弱榴生掩冉挿竹強支叉旋疊封根石能開著子花扶

持物遂性綴緝我成家故國田園少何須恨海涯

其五

大雞如人立小雞三寸長造物均付予危冠兩昂藏出

欄風易倒依草枯不殭後庭花草感憐汝計興亡

或言
矮雞

冠即玉樹

後庭花

其六

西隣分半井十口無渴憂歲旱百泉竭日供八家求艱
難念生理沾足愧寒流比聞山田婦出汲爭羣牛

山中澗谷枯竭汲者每苦牛奪其
水一人出汲輒數人持杖護之

和子瞻新居欲成二首

老罷子卿還屬國功成定遠恨陽關
漂流豈必風波際顛沛何妨枕席間
伏臘便應隨俚俗室廬聞似勝家山

因緣宿世非今日賴有陰功許旋還

此說見佛書

山連上帝朱明府心是南宗無盡燈
過此歌危空比夢年來瘴毒冷如冰
圖書一笑寧勞客音信頻來尚有僧
梨棗功夫三歲辦不緣憂患亦何曾

次遲韻二首

老謫江南岸萬里修烝嘗三子留二子嵩少道路長累
以二孀女辛勤具餼糧誰令南飛鴻送汝至我旁饑寒
不能病氣紓色亦康拊背問家事嗟我久已忘力耕當
及春無為久南方還家語諸女素剛非王章

其二

世事非吾憂物理有必至常暘百川竭顧亦防雨耳陰
陽相糾纏反覆更自治幽懷澹不起默坐識其意長子

念衰老遠行重慙愧疎慵身似僧岑寂家近寺但聞事
日新未覺吾有異器錙本自出藩角徒不遂得失衆共
知窮達佛所記要令北歸日粗究一大事

次遠韻

萬里謫南荒三子從一幼謬追春秋餘賴爾牛馬走憂
病多所忘問學非復舊借書里諸生疑事誰當叩吾兒
雖懶教擢穎既冠後求友卷中人玩心竹間岫時令檢
遺闕相對忘昏晝兄來試謳吟句法漸翹秀暫時鴻鴈

飛迭發墳簾奏更念宛邱子頽然何時觀

次韻子瞻和陶公止酒

雷州作

少年無大過臨老重復止自言衰病根恐在酒盃裏
今年各南遷百事付諸子誰言瘴霧中乃有相逢喜
連床聞動息一夜再三起汴流俛仰得此病竟何理
平生不尤人未免亦求已非酒猶止之其餘真止矣
飄然從孔公乘桴南海涘路逢安期生一笑千萬祀

次韻子瞻過海

我遷海康郡猶在寰海中送君渡海南風帆若張弓笑
揖彼岸人回首平生空平生定何有此去未可窮惜無
好勇夫從此乘桴翁幽子疑龍鰕牙須竟誰雄閉門亦
勿見一鰕同香風晨朝飽粥飯洗鉢隨僧鐘有問何時
歸茲焉若將終居家出家人豈復懷兒童老明真吾師
出入初猶龍籠樊顧甚密俛首姑爾容衆人指我笑羶
鎖無此工一瞬千佛土相期兜率宮

過姪寄柳冠

哀髮秋來半是絲幅巾緇撮強為儀垂空旋取海棕子

蜀中海棕即嶺南
椰木但不結子耳

束髮裝成老法師變化密移人不悟

壞成相續我心知茅簷竹屋南溟上亦似當年廊廟時

寓居二首

東亭

十口南遷粗有歸一軒臨路閱奔馳市人不慣頻回首
坐客相諳便解頤慙愧天涯善知識增添城外小茅茨
華嚴未讀河沙偈偃仰明窓手自披

東樓

月從海上湧金盆直入東樓照病身久已無心問南北
時能閉目待儀麟颶風不作三農喜是歲海無颶風舶客初來
百物新歸去有時無定在漫隨俚俗共欣欣

所寓堂後月季再生與遠同賦

客背有芳藂開花不遺月何人縱尋斧害意肯留枿偶
乘秋雨滋冒土見微茁猗猗抽條穎頗欲傲寒冽勢窮
雖云病根大未容拔我行天涯遠幸此城南茆小堂劣

容卧幽閣粗可躡中無一尋空外有四隣
匪窺牆數柚實隔屋看柳葉葱蒨獨茲苗
慙慙待其活及春見開敷三嗅何忍折

浴罷

逐客例幽憂多年不洗沐予髮櫛無垢身垢要須浴
顛隳本天運憤恨當誰復茅簷容病軀稻飯飽枵腹形骸
但癰瘁氣血尚豐足微陽閱九地浮彩見雙目枯槁如
束薪堅緻比溫玉長齋雖云淨閱月聊一沃石泉澣巾

幌土釜煮桃竹南窓日未移困卧久彌熟華嚴有餘帙
默坐心自讀諸塵忽消盡法界了無矚恍如仰山翁欲
就為叟卜猶恐墮聲聞大願勤自督

次遠韻齒痛

元明散諸根外與六塵合流中積緣氣虛妄無可託弊
陋少空明婦姑相攘奪日出瞋焦牙風來動危擇喜汝
因病悟或免終身著更須誦楞嚴從此脫纏縛

子瞻聞瘦以詩見寄次韻

多生習氣未除肉長安夜眠懶食粥屈伸久已效熊虎
倒掛漸擬同蝙蝠衆笑忍饑長杜門自恐暮年還入俗
經旬輒復駭隣父未信腦滿添黃玉海夷旋覺似齊魯
山蕨仍堪嘗菽粟孤船會復見洲渚小車未用安羊鹿
海南老兄行尤苦樵爨長須同一僕此身所至即所安
莫問歸期兩黃鵠

次韻子瞻獨覺

咄咄書空中有恠內熱搜膏發癰疥羹藜飯芋如固然

飽食安眠真一快
午雞鳴屋呼不起
欠申吉貝重衾裏
此身南北付天工
竹杖芒鞋即行李
夜長却對一燈明
上池溢流微有聲
幻中非幻人不見
本來日月無陰晴

次韻子瞻夜坐

月入虛牕疑欲旦
香凝幽室久猶薰
清風巧為吹餘瘴
疎雨時來報斷雲
南海炎涼身已慣
北方毀譽耳誰聞
遙知掛壁瓢無酒
歸舶還將一酌分

次韻子瞻寄賀生日

弟兄本三人懷抱喪其一頽然仲與叔耆老天所隲師
心每獨往可否輒自必折足非所恨所恨覆鼎實上賴
吾君仁議止海濱黜淒酸念母氏此恨何時畢平生賢
孟博苟生不謂吉歸心天若許定卜老泉室淒涼百年
後事付何人筆于今兄獨知言之泣生日

次韻子瞻寄黃子木杖

老至亦有漸五十惟杖始行年日辰匝幸免鄉閭恥罪
重瘡難平餘痂未脫痕登山足猶健不用扶兒子我兄

念辛勤贈此攜且倚他年賜環日田舍尤須此早收藤
節杯旋綴烏皮几茅簷數間足不用伐桐杞

次韻子瞻謫居三適

旦起理髮

道人雞鳴起趺坐存九宮靈液流下田伏苓抱長松顛
毛得餘潤冉冉欺霜風俯就無數櫛九九為一通洗沐
廢已久徐之勿忽忽氣來自湧泉至此知幾重近聞西
邊將袒裼擁馬鬣歸來建赤油不復儕伍同笑我守尋

尺求與真源逢人生各有安未肯易三公

午窓坐睡

定中龍眠膝定起柳生肘心無出入異三昧亦何有晴
窓午陰轉坐睡一何久頽然擁褐身剥啄叩門手褰帷
顧我笑疑我困宿酒不知吾喪我永消不遺壽空虛無
一物彼物自枯朽夢中得靈藥此藥從誰受侵尋入四
支欲洗自無垢從今百不欠只欠歸田叟

夜卧濯足

海民慢寒備不畜衾與裯雖苦地氣洩亦無徒跣憂逐
客久未安集舍占鵲鵲念昔使胡中車馳卒不留貂裘
遡北風十襲猶颼颼中塗履冰河馬倒身自投宛足費
馮翼千里煩褰韞十年事湯劑風雨氣輒浮南來足憂
慮此病何時瘳名身孰親疎慎勿求封侯

同子瞻次過遠重字韻

孟子自誇心不動未試永嘉鐵輪重弟兄六十老病餘
萬里同遭海隅送長披羊裘類嚴子罷食猪肝同閔仲

大男留處事田畝幼子隨行躬釜甕低眉語笑接隣父
彈指吁嗟到蠻洞茅茨一日敢忘葺桑柘十年須勉種
來時邂逅得相攜歸去逡巡應復從莫驚憂患爾來同
久知出處平生共雖令子孫治家學休炫文章供世用
賴川築室久未成夜來忽作西湖夢

次韻子瞻和淵明擬古九首

客居遠林薄依牆種楊柳歸期未可必成陰定非久邑
中有佳士忠信可與友相逢話禪寂落日共杯酒艱難

本何求緩急肯相負故人在萬里不復為薄厚米盡驚
衣衾時勞問無有

其二

閉門不復出茲焉若將終蕭然環堵間乃復有為戎我
師柱下史久以雌守雄金刀雖云利未聞能斫風世人
欲困我我已安長窮窮甚當辟穀徐觀百年中

其三

蕭蕭髮垂素晡日迫西隅道人愍我老元氣時卷舒歲

惡風雨交何不完子廬萬法滅無餘方寸可久居將掃
道上塵先拔庭中蕪一淨百亦淨我物皆如如

其四

夜夢被髮翁騎驎下大荒獨行無與遊闖然款我堂高
論何崢嶸微言何渺茫我徐聽其說未離翰墨場平生
氣如虹宜不葬北邙少年慕遺文竒姿揖昂昂哀罷百
無用漸以園斲方隱約就所安老退還自傷

其五

海康雜蠻蠻禮俗久未完我居近閭閻願先化衣冠衣冠一有恥其下胡為顏東隣有一士讀書寄賢闕歸來奉親友跬步行必端慨然顧流俗歎息未敢彈提提烏鳶中見此孤翔鸞漸能衣裘褐祖褐知惡寒

其六

佛法行中原儒者恥論茲功施冥冥中亦何負當時此方舊雜染渾渾無名緇治生守家室坐使斯人疑未知酒肉非能與生死辭熾哉吳閩間佛事不可思生子多

穎悟得報豈汝欺時俾正法眼一出照曜之誰為邑中
豪勤誦我此詩

其七

憂來感人心悵悵久未和呼兒具濁酒酒酣起長歌
罷還獨舞黍麥力誠多憂長酒易消脫去如風花不悟
萬法空子如此心何

其八

杜門人笑我不知有天遊光明遍十方咫尺陋九州此

觀一日成袞袞通法流竿木常自隨何必返故邱老聃
白髮年青牛去西周不遇闢尹喜履迹誰能求

其九

鉏田種紫芝有根未堪採逡巡歲月度太息毛髮改晨
朝玉露下滴瀝投滄海須臾忽長茂枝葉行可待夜燒
沈水香持戒勿中悔

雨中招吳子野先生

循州作

柴門不出蓬生徑暑雨無時水及堂辟穀賴君能作客

暫來煎蜜餉桃康

答吳和二絕

三間利水小茅屋不比麻田新
草堂問我秋來氣如火
此間何事得安康

慣從李叟遊都市久伴藍翁醉畫堂
不似蘇門但長嘯
一生留恨與嵇康

子野昔與李士寧縱遊京師
與藍喬同客魯魯公家甚久

閏九月重九與父老小飲四絕

九月龍山霜露凝
龍川九月氣如蒸
偶逢閏月還重九

金史卷之二
酒熱風高喜不勝

獲罪清時世共憎
龍川父老尚相尋
直須便作鄉關看
莫起天涯萬里心

客主俱年六十餘
紫萸黃菊映霜鬚
山深瘴重多寒勢
老大須將酒自扶

尉佗城下兩重陽
白酒黃雞意自長
卯飲下床虛已散
老年不似少年忙

求黃家紫竹杖

并引

予於龍川買曾氏小宅宅西南隅有紫竹百餘竿為
藤蔓所困無復直幹雖為伐藤而見竹偃弱無可為
杖者黃氏老家有紫竹甚茂乞得一莖勁挺可喜聞
黃氏竹舊自曾氏移植偶為詩示之

曾家紫竹君家種曾園竹與荒藤共藤驕竹瘁如畏人
不似君家竹森聳我來買宅非為宅愛此風梢時一弄
磨刀向藤久未忍樹倒藤披真自送繁陰一豁新笋地
狂鞭欲向青春動我身病後少筋力遍求拄杖扶腰痛

蕭蕭瘦幹未能任一畝君家知足用一枝遺我拄尋君
老酒仍煩為開甕

賦豐城劍

北歸途中作

劍氣夜干斗精誠初莫隔全身寄獄戶隱約還自得張
雷彼知我勉為汝一出腰間雜環佩亦既報之德凜凜
天地間要非手中物躍入延平水三日飛霹靂出當乘
風雷歸當卧泉石千年故穴在三嘆泉上客

范丞相堯夫挽詞二首

許州作

持身守忠恕臨事恥浮沈直道更三黜平生惟一心家
風來自遠國論老彌深令德真如玉泥沙枉見侵

其二

南遷頭已白北返病初加君意知無罪天心許到家同
朝曾忝舊握手一長嗟時事紛無已還應付棣華

卜居

我歸萬里初無宅鳳去千年尚有臺誰為遠池先種竹
可憐當砌已栽梅囊貲只數腰金在歸計長遭鬢雪催

欲就草堂終歲事落成隣舍許銜杯

和子瞻過嶺

山林瘴霧老難堪歸去中原茶亦甘
有命誰令終返北無心却笑欲巢南
蠻音慣習疑僮語脾病縈纏帶嶺嵐
手挹祖師清淨水不嫌白髮照氈氈

子瞻贈嶺上老人次韻代老人答

嶺頭盧老一爐灰長短根莖各自栽
輕賤已消先世業知君海上去仍回

樂城後集卷二

欽定四庫全書

樂城後集卷三

宋 蘇轍 撰

詩七十首

大行皇太后挽詞二首

累朝宗內治晚歲擅鴻勲立子得元聖收簾奉長君一
言消橫逆多難弭紛紜仙馭曾非遠長瞻輦洛雲

家風承舊相國體繼皇姑定策從中禁傳聲震海隅春

風開閉蟄朝露濕焦枯萬里生還客冠纓淚雨濡

追尊皇太后挽詞二首

月缺年何久龍飛事一新追崇名號正同祔禮容均鳳
翣低迎日龍輜起細塵都人知舜孝擁紼盡霑巾

德美鍾岐嶷榮華倍感傷一時朝野恨百世本支長出
祖悲無憾因山儉有光他年過嵩洛望拜裕陵旁

贈史文通奉議二首

牆北史居士掛冠心轉閑頂開人共恠神去夜深還白

雪微侵鬢丹砂久駐顏從君欲問道何日徑開關

其二

有叟住東野畏人希入城君時共還往我欲問修行早
歲識巖客近時逢絳生真能訪茅屋屣屣試將迎

次前韻示楊明二首

晚歲有餘樂天教一向閑高陽百口住嶺外七年還卜
宅先隣晏攜瓢欲飲顏吳僧來不久相約叩禪關

其二

甘井元衣廟平胡亦近城幅巾朝食罷芒屨雨中行擾
擾初何事悠悠畢此生欲邀東郭叟煩子作郊迎

唐修撰義問挽詞二首

家風臺柏老遺直故依然節見南遷後神凝未瞑前臨
民舊有法訓子適成篇九轉今猶在參同豈妄傳

其二

我返南荒日君臨舊許初笑談寬老病旌旆擁茅廬酒
盞開雖數溪堂到尚疎誰言生死隔近在浹旬餘

寄題登封揖仙亭

靈王太子本讀書縱談穀洛參諸儒生來不見全盛初
老成遺訓誰楷模心知漸失文武餘蕭然直入山中居
山間吹笙鳳凰呼升天白日乘龍車周人聚觀拜路隅
明月為佩雲為裾歸來千歲孰在無赤松老彭自為徒
上侍玉宸臨九區烜赫不類山澤癯依山作邑賢大夫
夜中焚香遡空虛我欲從之駕肩輿秋風八月來徐徐
吳冲卿大夫秦國挽詞二首

國老相隨盡家風慨獨存見夫成相業聽子得忠言

夫人

長子起居昔將論事以南遷之憂訪於夫人夫人以當官許焉

氣節慙多士聲華盛一

門平生高義重未易俗人論

雅頌成章早春秋發論長風規留叔向文采似中郎覽
古明興廢臨危喜激昂南遷初不恨李杜得從滂

十一月十三日雪

南方霜露多雖寒雪不作北歸亦何喜三年雪三落我
田在城西禾黍敢嫌薄今年陳宋災水旱更為虐閉糴

斯不仁逐熟自難卻饑寒雖吾患尚可省鹽酪飛蝗昨
過野遺種遍陂澤春陽百日至閘若蠶生箔得雪流土
中及泉盡魚躍美哉豐年祥不待炎火灼呼兒具樽酒
對婦同一酌誤認屋瓦鳴更願聞雪脚

補子瞻贈姜唐佐秀才

并引

予兄子瞻謫居儋耳瓊州進士姜唐佐往從之遊氣
和而言道有中州士人之風子瞻愛之贈之詩曰滄
海何曾斷地脈白袍端合破天荒且告之曰子異日

登科當為子成此篇君遊廣州州學有名學中崇寧
二年正月隨計過汝南以此句相示時子瞻之喪再
逾歲矣覽之流涕念君要能自立而莫與終此詩者
乃為足之

生長茅間有異芳風流稷下古諸姜適從瓊管魚龍窟
秀出羊城翰墨場滄海何曾斷地脈白袍端合破天荒
錦衣他日千人看始信東坡眼目長

遷居汝南

我昔還自南從此適舊許再歲常杜門壁觀無與語何
人自驚顧未聽即安處亟逃潁州籍來貫汝南戶妻孥
不及將童僕具搏俎身如孤棲鵲夜起三遶樹故人樂
安生風節似其父忻然斲一笑捨我西南去去已還閉
門時作野田步蕭條古僧舍遺像得顏魯精神凜如生
今昔吾與女已同羈窮厄但脫生死怖幸世方和平有
土非寇虜春寒燒黃茅晝飯煮青茹何必濕上田幸此
足粳稌歸心念狂簡裁製時已莫

索居三首

索居非謫地垂老更窮途去住看人意幽憂賴我無小
園花草穢陋巷犬羊俱近覺根塵離忘言日益愚

其二

平生亦何事十載苦顛躋夢嶮曾非嶮覺迷終不迷客
居兼壯子別久愧良妻稍訝音書濶春陰道路泥

其三

許蔡古隣國風煙相雜和蕭然客舍靜不願主人過野

薺春將老淮魚夏漸多街南病居士有酒對酣歌

聞諸子欲再質卞氏宅

我生髮半白四海無尺椽卞氏昔冠冕子孫今蕭然願
以棟宇餘救此朝夕懸顧我亦何有較子差尚賢傾囊
不復惜掃地幸見捐南隣隔短牆兩孫存故廬松竹手
自種風霜歲逾堅幽花亂蜂蝶古木嘶蜩蟬垂陰可數
畝成功幾百年人心苦無厭隱居恨未圓得之苟有命
老矣聊息肩畚土填隙穴結茅苴漏穿粗爾容偃息豈

復求華鮮西歸信已乎永雜孫陳編

任氏閱世堂前大檜

君家大檜長百尺根如車輪身弦直壯夫連臂不能抱
孤鶴高飛直上立狂風動地舞枝榦大雪翻空洗顏色
人言此檜三百年未知昔是何人植君家大夫老不遇
一生使氣未嘗屈沒身不悅歸故里遺愛自知懷舊色
此翁此檜兩相似相與閱世何終極汝南山淺無良材
櫟柱棟掾耶障日便令殺身起大厦亦恐衆材無匹敵

且留枝葉撓雲霓猶得世人長太息

贈蔡駟居士

結茅汝上只三間種稻城西僅一廛
梅老外生詩律在秀公弟子佛心傳
埋盆疊石常幽坐留客開樽輒醉眠
聞道隣僧乞米送時無韓子定誰憐

癸未生日

我生本無生安有六十五生來逐世法
妄謂得此數隨流登中朝失脚墮南土
人言我當喜亦言我當懼我心

終頽然喜懼不入故歸來二頃田且復種禾黍或疑穎
川好又使汝南去汝南亦何為均是食粟處兒言生日
至可就瞿曇語平生不為惡今日安所訴老聃西入胡
孔子東歸魯我命不在天世人汝何預

白鬚

中歲謬學道白鬚何由生故人指我笑聞道未能行我
笑謝故人唯唯亦否否老聃古道師白髮生而有佛告
波斯匿汝有太白存亭中掌亭人何嘗隨客奔客去不

用留主在亭不毀墁牆支折棟在我不在爾道成款玉
晨跪乞五色丸肝心化黃金齒髮何足言

寒食二首

寒食今年客汝南餘樽傾瀉亦醺酣道人久厭世間濁
僧舍猶存肉食慙花折園夫時送客餽留孫女尚分甘

永叔詩有為翁
寒食留餽之句

欲遊紫極誰為伴長揖孤松對不談

紫極

宮有巨松

可數人抱

寄住汝南懷嶺南五年一醉久猶酣身逃爭地差云靜

名落塵寰終自慙耳畔飛蠅看尚在鼻中醇酢近能甘
今朝寒食唯當飲買酒先防客欲談

潁川城東野老

姓劉氏
名正

我歸潁川無故人城東野老鬚如銀少年椎埋起黃塵
晚歲折節依仙真走如磨鹿人莫親呼來上堂飲清樽
踞牀閉目略頻伸指我黃河出崑崙東流入海還天津
沐浴周遍纔逡巡嬰兒跣趺乘日輪脫身遊戲走四鄰
逢人不告非自珍許我已老知閉門東朝太行歟真君

告我不返遊我岷還家一舍卧不晨闔棺空空但衣巾
平生自言師洞賓嗟世賤目貴所聞

汝南示三子

此生賴有三男子到處來看老病翁飲食粗便魚稻足
音塵不隔馬牛風道場莫問何方是舍宅元依畢竟空
且爾不歸歸亦得汝曹免復走西東

謝任亮教授送千葉牡丹

花從單葉成千葉家住汝南疑洛南亂剝浮苞任狼籍

併偷春色恣醺酣香穠得露久彌馥頭重迎風似不堪
居士誰知己離畏金槃剪送病中庵

思歸二首

汝南百日留走遍三男子思歸非吾計聊亦為爾耳行
裝理肩輿客舍卷床第兒言世情惡平地風波起舟行
或易搖舟靜姑且已匏繫雖非願蠖屈當有竢老人思
慮拙小子言有理晨炊廩粟紅曉市淮魚美索居庖無
人歸去迎伯姊終歲得安閑幽居無彼此

其二

我老不待言有女年四十念我客汝南無與具朝食
翩然乘肩輿面有風土色許蔡雖云近傳舍三經夕
衰老累汝曹愧歎心不憚磨刀鱸縷紅洗盞酒花白
母老行役難女來生理葺外孫跨鞍馬遇事亦閑習
居然數口家解我百憂集厄窮須父子他人非所及

萬蝶花

誰唱殘春蝶戀花一團粉翅壓枝斜美人欲向釵頭插

又恐驚飛鬢似鴉

春盡

三月二十三日立夏

春風過盡百花空
燕坐笙簫起滅中
樹影連天開翠幕
鳥聲入耳當歌童
楞嚴十卷幾回讀
法酒三升是客同
試問隣僧行乞在
何人閑暇似袁翁

夢中詠醉人

四月十日夢得篇
首四句起而足之

城中醉人舞連臂
城外醉人相枕睡
此人心中未必空
甞爾頽然似無事
我生從來不解飲
終日騰騰少憂累

昔年曾見樂全翁自說少年飲都市一時同飲石與劉
不論升斗俱不醉樓中日夜狂歌呼錢盡酒空姑且止
都人疑是神仙人誰謂兩人皆醉死此翁年老不復飲
面光如玉心如冰我今在家同出家萬法過前心不起
此翁已死誰與言欲言已似前生記

立秋偶作

六月二十三日

十年憂患本誰知慙愧仙翁有舊期度嶺還家天許我
斲山種粟我尤誰秋風欲踐故人約春氣潛通病樹滋

心似死灰鬚似雪眼看多事亦奚為

汝南遷居

病暑暑已退思歸未成歸人事不可期當受不當違客
居汝南城未覺吾廬非忽聞鵲反巢坐使鳩驚飛三遶
擇所安一枝粗得依我來衆草生漸見百卉腓天行若
循環物化如發機閉目內自觀此理良密微

寄內

與君少年初相識君年十五我十七上事姑章旁兄弟

君雖少年少過失昏晨定省歲月短五十還朝定何益
憂深責重樂無幾失足一墜南海北身居甯中不見天
仰面虛空聞下石丈夫學道等憂患婦人亦爾何從得
歸去舊許生白鬚回顧慙君髮如漆遷居汝南復何事
龜老支牀隨所擲相望一月兩得書聞君肺病久消釋
我經三伏常暴下近喜秋風掃蒸濕病除寢食未復故
相見猶驚身似腊劉根夫婦俱有道去日饒君著鞭策

病愈二首

學道雖云久沈疴竟未除炎烝度三伏晡曖覺中虛嘉
穀不自長荒榛終費鉏何辭用蘭石梨棗得扶疎

其二

病退日身輕身輕心轉清山空流水上海靜寸燈明朝
市誰留住佳林泉自不行筠溪慙丐士流蕩過平生

九月三日

早歲寡歡意衰年仍病纏客居逢九日斗酒破千錢萸
菊驚秋晚兒孫慰目前登高懶不出多酌任頽然

其二

狂夫老無賴見逐便忘歸小酌還成醉僑居不覺非妻
孥應念我風雨未縫衣憂患十年足何時賦式微

其三

黃菊與秋競白鬚隨日添時人知不憚野老未相嫌但
酌清樽盡猶存薄俸霑日西聞客至更問酒家帘

立冬聞雷

九月二十九日

陽淫不收斂半歲苦常燠禾黍飼蝗螟粳稻委平陸民

饑強扶耒秋晚麥當宿閔然候一雨霜落水泉縮蒼蔚
山朝隴滂沱雨翻瀆經旬勢益暴方冬歲愈感半夜發
春雷中天轉車轂老夫睡不寐稚子起驚哭平明眎中
庭松菊半摧秃潛發枯草萌亂起蟄蟲伏薪樵不出市
晨炊午未熟首種不入土春餉難滿腹書生信古語洪
範有遺牘時無中壘君此意誰當告

將歸二首

十月初
三日作

久客初何事言歸似有名騰騰且隨俗落落竟無成病

苦醫猶厭囊空身自輕家人驚別後無限白鬚生

其二

為客不滿歲還家見兩孫遙知臨竹戶相對引瓢樽老
罷那嫌瘦心寬尚喜存風波隨處有何幸免驚奔

示資福諭老

并引

予讀楞嚴至塵既不緣根無所偶反流全一六用不
行釋然而笑曰吾得入涅槃路矣然孤坐終日猶苦
念不能寂復取楞嚴讀之至其論意根曰見聞逆流

流不及地名覺知性乃歎曰雖知返流未及如來法
海而為意所留隨識分別不得名無知覺明豈所謂
返流全一也哉乃作頌以示諭老

幽居百無營孤坐若假寐根塵兩相接逆流就一意意
念紛無端中止不及地寂然了無覺乃造真實際百川
入滄溟衆水皆一味止為潭淵深動作濤瀾起動止初
何心乃遇適然耳吾心未嘗勞萬物將自理

三不歸行

客心搖搖如懸旌三度欲歸歸不成方春欲歸我自懶
秋冬欲歸事自變問我欲歸定何時天公默定人不知
孔公晚歲將入楚磐桓陳蔡行且住昭王已死不復南
意欲歸老父母邦衛靈父子無足取姑爾息肩俟東魯
三桓豈知用聖人哀公亦自不能臣冉求一戰卻齊虜
請君召師君亦許歸來閉戶理詩書弁冕時出從大夫
夢見周公已不復老死故國心亦足孔公愈老愈屯遭
顧我未及門下賢鄉邦萬里不能往妻孥近寄潁川上

依嵩架穎結茅茨自問此志於何期汝南一寓歲行復
來年歸去栽松竹

罷提舉太平官欲還居負川

避世山林中衣草食芋栗柰何處朝市日耗太倉積中
心久自笑公議肯相釋終然幸寬政尚許存寄秩經年
汝南居久與茅茨隔祠官一掃空避就兩皆失父子相
攜扶里巷行可即屋弊且圯牆蝗餘尚遺粒交遊忌點
染還往但親戚閉門便衰病杜口謝彈詰餘年迫懸車

奏草屢濡筆籍中顧未敢爾後儻容乞幽居足暇豫肉食多憂慄永懷城東老未盡長年術

次遲韻寄适遜

饑民畏寒尤惡雪旋理破裘絰敗纈我雖久客未成歸
黍酒釐羹還潑節汝南薪炭舊如土爾來薄俸纔供爇
眼前煖熱無可道心下清涼有餘潔潁川歸去知何時
祠宮欲罷無同列夜中髣髴夢兩兒欲迓老人先聚說

次遲韻對雪

十一月二
十七日

雪寒近可憂麥熟遠有喜我生憂喜中所遇一已委平生聞汝南米賤豚魚美今年惡蝗旱流民鬻妻子一食方半菽三日已于耜號呼人誰聞愍惻天自邇繁陰忽連夕飛霰墮千里卷舒驚太速原隰殊未被貧家望一麥生事如毛起荐饑當逐熟西去真納履

還潁川

甲申正月五日

昔賢仕不遇避世遊金馬嗟我獨何為不容在田野歌區寄汝南落泊反長社東西俱畏人何適可安者故廬

已荆榛遺壠但松檟頽齡迫哀暮舊物一已捨安能為
妻孥辛苦問田舍平生事瞿曇心外知皆假歸休得溟
渤坐受百川瀉何人實造物未聽相陶冶

題鄆城彼岸寺二首

文殊院古栢

曾看大栢孔明祠行盡天涯未見之此樹便當稱子行
他山只可作孫枝棟梁知是誰家用舟楫唯應海水宜
日暮飛鵑集無數青田老鶴未曾知

武宗元比部畫文殊玄獎

遺墨消磨顧陸餘開元一一數吳盧本朝唯有宗元近
國本長留後世模出世真人氣雍穆入蕃老釋面清癯
居人不惜遊人愛風雨侵陵色欲無

上巳日久病不出示兒姪二首

春氣侵脾久在牀開門桃李著泥香牛鳴頗覺西湖近
鳳去長憐北榭荒欲出老人無伴侶退歸諸子解農桑
南鄰約賣千竿竹拄杖穿林看笋長

卧聞諸子到西湖
鵲鷺翩翩衆客俱
紈扇藤屨試輕駛
隻雞斗酒助歡娛
行歌久已饒渠輩
睡美猶應屬老夫
春服既成沂可浴
孔門世不乏迂儒

葺東齋

三月十八日

弊屋如鷺巢
歲歲添泥土
泥多暫完潔
屋老終難固
况復非吾廬
聊爾避風雨
圖書易新幌
几杖移故處
宵眠不擇安
鼻息若炊釜
兒孫喜相告
定省便蚤莫
我生溪山間
弱冠衡茅住
生來乏華屋
所至輒成趣
苦恨無囊

金莫克償地主投老付天工著身豈無所

次遲韻千葉牡丹二首

濕上名園似洛濱花頭種種鬪尖新共傳青帝開金屋
欲遣姚黃比玉真秦嶺猶應篆詩句杜鵑直恐降天神
老人髮少花頭重起舞歌斜酒力勻

老人無力年年懶世事如花種種新百巧從來知是妄
一機何處定非真園夫漫接曾無種物化相乘豈有神
畢竟春風不揀擇隨開隨落自勻勻

盆池白蓮

白蓮生淤泥清濁不相干道人無室家心迹兩蕭然我
住西湖濱蒲蓮若雲屯幽居常閉戶時聽遊人言色香
世所共眼鼻我亦存鄰父閔我獨遺我數寸根淚水不
入園庭有三尺盆兒童汲甘井日晏泥水溫及秋尚百
日花葉隨風翻舉目得秀色引息收清芬此心湛不起
六塵空過門誰家白蓮花不受風霜殘

詠竹二首

湖濱宜草木脩竹可三尋
屢居多野思移種近牆陰
及爾迷未醒方予熱正侵
無嫌不逮本地薄肯成林

其二

南隣竹甚茂門巷不容賓
縣印君當往囊金我患貧
翠旌稍亂起犀角筍初勻
不惜圖書賣端來作主人

見兒姪唱酬次韻五首

芝蘭生吾廬一雨一增舊
本亦何預人懷抱終眷眷
老傳時已迫塵垢日須浣
永慙舊文書展讀不終卷

其二

讀書雖不惡不讀亦自好
根牙就區別花實隨時老
耘鋤不可無雨露勿憂少
我釣不在魚一竿寄洲島

其三

宇宙非不寬閉門自為阻
心知外塵惡且忍閑居苦
跣跌默非睡龕燈翳復吐
道士為我言嬰兒出歌舞

其四

身病要須閑閑極自成趣
空虛雖近道懶拙初非悟
偶

將今生脚還着古人履大小適相同本來無別處

其五

西湖雖不到甘井竊餘涼三伏罷飲酒桂漿攜一觴冠
者五六人起舞互低昂人生有離合此歡未易忘

初得南園

倒囊僅得千竿竹掃地初開一畝宮千里故園蒐夢裡
百年生事寂寥中晏家不願諸侯賜顏氏終成陋巷風
洗竹移花吾事了子孫他日記衰翁

移竹

牆陰竹蒙密板築念相妨欲補園東缺欣乘雨後涼三
年生筍遍一徑引風長但恐翁彌老筇枝懶復將

記夢

七月二十六日

長魚三尺困橫盆送入清流喜欲奔報我金匙僅盈寸
擲還聊喜不貪存

樂城後集卷三

欽定四庫全書

樂城後集卷四

宋 蘇轍 撰

詩七十首

葺居五首

南堂初一家隔絕歲月久開牆北風入爽氣通戶牖棟
梁未摧折斤斧聊結構非言事輪奐粗反昔人舊

其二

庭方止數尋風月所從入百年養毒樹攢芒比刀戟伐
之念生久不伐愁跣足且復為人謀庖樵利朝食

皂角木宜

樵食

其三

竹林失蕃養春筍日瑣細草蔓半縈纏樗櫟互虧蔽已
令具刀鐮稍試秋霜厲欲成林下飲更種園東地

其四

雜花生竹間竹荒花亦瘁移花通狂鞭春到兩皆遂牆

東破茅屋排去收遺趾時來拾瓦礫細細留花地

其五

東南皆民居屋敗如齟齬一完誠未能綴葺聊且爾內
修晨夜虞外結比隣喜無心本何營生理未免此

再賦葺居三絕

誰將脩竹寄隣家秋斫長竿春食芽旋築高牆護雞犬
稍容嵇阮醉喧譁

短垣疏戶畧藏遮翠竹長松夾徑斜遊宦歸來四十載

粗成好事一田家

南北高堂本富家百年梁柱半歌斜
畧教扶起猶堪住西望吾廬已自奢

歲莫口號二絕

六十年來又七年眼昏頭白意茫然
逢人欲說平生舊少有能知兩世前

兩世相逢今幾人回頭強半已埃塵
此心點檢終如一時事無端日日新

雪後小酌贈內

乙酉正月九日

薄雪為燈止和風應節來
出遊吾已懶小酌意難裁
竹徑泥方滑菁畦凍欲開
細君憐老病加料作新醅

喜雨

三月二十三日

奪官分所廿年來祿又絕
天公尚憐人歲賚禾與麥
經冬雪屢下根鬚連地脈
庖厨望麤餌甕盎思麴蘖
一春百日旱田作龜板
拆老農淚欲墮無麥真無食
朱明候纔兆風雷起通夕
田中有人至膏潤已逾尺
繼來不違

願飽食真可必民生亦何幸天意每相恤我幸又已多
鋤耒坐不執同爾樂豐穰異爾苦稅役時聞吏號呼手
把縣符赤歲賦行自辦橫斂何時畢

收蜜蜂

空中蜂隊如車輪中有王子蜂中尊分房減口未有處
野老解與蜂語言前人傳蜜延客住後人秉艾催客奔
布囊包裹開如市盆入竹屋新且完小窻出入旋知路
幽圃首夏花正繁相逢處處命儔侶共入新宅長子孫

今年活計知尚淺
蜜臘未暇分
主人明年少
割助和藥
慙愧野老知利源

養竹

病竹養經年生
筍大如母
初番放出林
末番任供口
欲求五寸圍
更聽三年後
蕭疎盡椽桷
無復堪作帚
吾廬適營葺
便可開戶牖
秀色到衣冠
清風盪塵垢
物生恨失養
養至無不厚
斧斤日摧剝
陰陽自難救
閑居翫草木
農圃即師友
養人如養竹
舉目皆孝秀

和遲田舍雜詩九首

并引

吾家本耆山田廬之多寡與楊子雲等仕宦流落不
復能歸中竄嶺南諸子不能盡從留之潁川買田築
室餘饑寒之患既蒙恩北還因而居焉然拙於生
理有無之計一付諸子夏五月麥方登場遲往從諸
農夫簞瓢銍艾知以為樂作詩九章澹然有詩人之
思歸而出之為和之云

麥生置不視麥熟為一來我懶客亦惰田荒誰使開勤

事知有獲直駕獨未回交遊悉吾病門巷多蒼苔

其二

我生無定居投老旋求宅未暇棟宇完先問松筠碧床
銳日益銷車轄轉生澁東家雖告貧鬻否猶未必

其三

偶自十年閑非繼七人作早歲漫云云志大終落落齒
髮已半空頭顱不難度顏曾本吾師終身美藜藿

其四

至人竟安在陶鑄皆糝糠世俗那得知楚楚事冠裳方
醉狂正作吾語未可莊天定能勝人更看熟黃梁

其五

平湖近西垣杖屨可以遊偶從大夫後不往三經秋盎
中插蒲蓮菱芡亦易求閉門具樽俎父子相獻酬

其六

試問西寺僧云何古佛意別無安心法但復麤師餽外
物來無從往亦無所至佛法見在前我亦從此逝

其七

老佛同一源出山便異流
少小本好道意在三神洲
子房見黃石願封小國留
終老預人事斷穀為呂憂

其八

蒼然澗下松不願世雕刻
斧斤百夫手牽挽千牛力
斲成華屋柱加以綴衣飾
人心喜相賀松心終自惜

其九

汲汲陷有為昏昏墮無記
湛然古井水心在獨無意
讀

書非求解食粟姑自遂幸有三男子力田奉租稅

雨病

晴送麥入倉雨催穀含穗共恠天公仁曲盡老農意誰
為三日霖下漉一大地百谷爭奔流通川不可厲夜聞
屋山落晝說城闔閉老羸知奈何脾病尤所畏中宵得
暴下亭午卧忘起良醫過我言勿藥行自喜損食存谷
神收心辟邪氣兀然槁木居油爾元和至天唯不窮人
人則昧其理學道三十年愧爾良醫賜

施崇寧寺馬

并引

予自龍川還潁川安於閑放不畜車馬僧悟緣自成
都來為予致一滇馬甚駿日聞公歸自南方家無良
駟此可以備登山之乘予愧其意不能卻也然馬入
吾廬軌苦多病意其非吾物也西鄰僧道和禪席之
盛鄉閭之所聳走乃祝之曰俾爾為和馬歸依佛法乘
病或已乎因為詩以示和

南歸閉門萬事了病卧常多起常少未用田間下澤車

何須櫪上追風驃鄉人記我少年日滇馬為致風前鳥
三年伏櫪人共恠馬不能言心可曉坐馳千里氣蟠結
日食生芻空自笑主人自是箕穎人誰復為送洮岷道
支公惠眼識神駿山下泉甘足芳草法流一洗百病消
翹足長鳴且忘老

南堂新斲花壇二首

亂竹侵紅藥病花羞晚春移根近談笑得土長精神榮
悴非由爾芬芳止為人庭西井泉好汲灌每躬親

其二

老木不忍伐橫枝宜少除根莖漸有託雨露稍分餘生
意初無損開花終自如他年諸草木成就此幽居

夢中謝和老惠茶

西鄰禪師憐我老北苑新茶惠初到晨興已覺三嗅多
午枕初便一杯少七碗煎嘗病未能兩腋風生空自笑
定中直往蓬萊山盧老未應知此妙

新霜

敗簷疏戶秋寒早老人脚冷先知曉濃霜滿地作微雪
落葉投空似飛鳥新春未覺廩庾空宿逋暗奪衾裯少
早田首種未言入敢信來年真食麩

戲作家釀二首

方暑儲麴蘖及秋舂秫稻甘泉汲桐栢火候問鄰媪唧
唧鳴甕盎瞰瞰化梨棗一撥欣已熟急搗嫌不早病色
變渥丹羸軀驚醉倒子雲多交遊好事時相造嗣宗尚
出仕兵廚可常到嗟我老杜門柰此平生好未出禁酒

國恥為甕間盜一醉汁滓空入腹誰復告

俗諺有入腹無賊之語

我飲半合耳晨興不可無千錢買一斗衆口分須臾月
俸本有助法許吏未俞慙慙坐相眎饑涎落盤盂潁潁
舊乏水粳糯貴如珠今年利陂竭碓聲喧里間典衣易
鍾釜入甕生醞醕歡欣走童孺左右陳肴蔬細酌奉翁
媪餘潤霑庖廚詰朝日南至相戒留全壺一家有喜色
經冬可無沽莫恠杜拾遺斗水寬憂虞

冬至雪

早久魃不死連陰未成雪微陽九地來顛風三日發父
老竊相語號令風為節講武罷冬夫畿甸休保甲纍囚
出死地冗官去煩雜手詔可人心吾君信明哲風頻雪
猶吝來歲恐無麥天公聽一言惟幸早誅魃

歲莫二首

嶺南萬里歸來客賴上六年多病身未死誰言猶有命
長閑豈復更尤人眼看世事知難了手注遺編近一新
點檢平生無幾恨濁醪初熟正逢春

文章習氣消未盡般若初心老漸明粗有春秋傳舊學
終憑止觀定無生維摩晚亦諧生事彌勒初猶重世名
鬚髮來年應更白莫留塵滓溷澄清

春後望雪

秋雨僅熟禾冬雪不揜塊溫風搜麥根天意欲為害老
農強推測妄謂春當改三陽已換節六出尚茫昧朝看
扶桑暎夜聽土囊噫倉場久空竭榆棗方伐賣丁夫病
風熱孺子作瘡疥無知此何辜得罪彼有在造物伊誰

憎亦復自無奈慎勿翻雪海凍餒無疆界

除夜

年更六十七旬滿三百六俛仰定何為萬事如轉轂禪
心澹不起非人自歌哭芸芸初莫禦勢盡行將復學道
道可成無心心每足守歲聽兒曹自笑未免俗

喜雨

歷時書不雨此法存春秋我請誅旱魃天公信聞不魃
去未出門油雲裏嵩邱濛濛三日雨入土如膏流二麥

返生意百草萌芽抽農夫但相賀漫不知其由魃來有
巢穴遺卵遍九州一掃不能盡餘孽未遽休安得風雨
師速遣雷霆搜衆魃誠已去秋成儻無憂

甲子日雨

一冬無雷麥方病細雨迎春歲有望愁見積陰連甲子
復令父老念耕桑瘦田未足終年計濁酒誰供清旦嘗
賴有真人不饑渴閉門卻掃但焚香

新火

百口共一竈終年事烹煎力耕飼饑饉竈火亦煩昨
日一百五老穉俱食寒呼童戛枯竹粲然吐青煙適從
何方來熒熒百家傳性火出真空應量曾無邊老病何
所求石餅煮寒泉歛為一夫用無心固當然

次韻和人詠醪醕

蜀中醪醕生如積開落春風山寂寂已憐正發香晻曖
猶愛未開光的皜半垂野水弱如墜直上長松勇無敵
風中婀娜應數丈月下煌煌真一色故園聞道開愈繁

老人自恨歸無日
百花已過春欲莫
燕坐繩床空數息
朝來滿把得幽香
按頭亂插銅鈺濕
一番花葉轉頭空
誰能往問天台拾

閑居五詠

杜門

可憐杜門久不覺
杜門非牀銳日日
銷髀肉年年肥眼
暗書罷讀肺病酒
亦稀經年客不至
不冠仍不衣視聰
了不昧色聲久已
微終然渾為一誰
言我無歸

坐忘

少年嘗病肺納息肺自斂靈液洗昏煩百藥無此驗爾
來觀坐忘一語頓非漸道妙有至力端能破諸暗跼
百無營純白乃受染至人不妄言此說豈吾僭

讀書

習氣不易除書魔間即至圖史紛滿前展卷輒忘睡古
今浩無垠得失同一軌前人己不悟今人復如此慙然
嫠婦憂嗟哉肉食鄙掩卷勿重陳慟哭傷人氣

買宅

我老未有宅諸子以為言東家欲遷去餘積尚可捐一
費豈不病百口儻獲安田家伐榆棗賦役輸緡錢長大
可雙棟瑣細堪尺椽生理付兒曹老幸食且眠

移竹

前年買南園本為一畝竹稍去千百竿欲廣西南屋本
心初不爾百口居未足黽勉斤斧餘慙愧琅玕綠東園
有餘地補種何年復凜凜歲寒姿餘木非此族

城中牡丹推高皇廟園遲迨聯騎往觀歸報未開
戲作

漢廟名園甲潁昌洛川珍品重姚黃雨餘往看初疑晚
春盡方開自不忙爭占一時人意速養成千葉化功長
老人終歲闢門坐花落花開已兩忘

外孫文驥與可學士之孫也予親教之學作詩俊
發猶有家風喜其不墜作詩贈之

已矣石室老奄然三十年遺孫生不識妙理定誰傳孔

仍仍聞道賈嘉終象賢文章猶細事風節記高堅

春深三首

郊原紅綠變青陰閉戶不知春已深
稍喜荒畦添野薺坐看新竹補疎林
簾中飛絮縈殘夢窓外啼鶯伴獨吟
欲聽楞嚴終懶出道人知我祖無心

僧維覺時
講楞嚴

小園松竹有清陰懶病從茲日益深
醉客滿堂慙北海野僧同社憶東林
逢人問道空長嘯久客思歸尚越吟
三十年前誦圓覺年來雖老解安心

偶有茅簷澗水陰

澗水自西湖聽水亭下派流自城北而東吾廬適在其南

近依城

市淺非深幽居每自比陳寔古學何人貴杜林
隣父時來陪小飲兒曹頗解續微吟前年僅了
春秋傳後有仁人知我心

次遲韻示陳天倪秀才姪孫元老主簿

茅簷有佳客肅肅清風興吾孫成均來左右皆良朋為
憐衆兄弟將冠未有稱條枚失爚燎中林化薪蒸老夫
方苦貧不辦酒如澠夏田已失麥種豆喜多蠅

俗以多蠅為豆

熟之
何以待君子簞瓢容一升君來豈非誤門庭冷如
冰

再次前韻示元老

豪傑多自悟不待文王興四方有餘師十室豈無朋我
老不知時早歲誰誤稱歸來理茅屋對客食藜蒸遇渴
即飲水何嘗問淄澠冠裳強包裹毀譽如飛蠅植根久
已爾苔蘚日自升忘我亦忘法無冰知消冰

築室示三子

宅舍元依畢竟空，小乘慣住草庵中。
一生滯念餘妻子，百口僑居怯雨風。
松竹已栽猶稍稍，棟梁未具勿怱怱。
三間道院吾真足，餘問兒曹莫問翁。

開窓

綠竹琅玕色，紅葵旌節花。
開窓風細細，窺戶月斜斜。
活計無多子，文章自一家。
一牀方病卧，隨意上三車。

遜往泉城穫麥

少年食稻不食粟，老居潁川稻不足。
人言小麥勝西川。

雪花落磨煮成玉冷淘槐葉冰上齒湯餅羊羹火入腹
五年隨俗粗得飽晨朝稻米纔供粥兒曹知我老且饒
觸熱泉城正三伏田家有信呼即來亭午驅牛汗如浴
吾兒生來讀書史不慣田間爭斗斛今年久旱麥粒細
及半罷休饒老宿歸來爛熳煞蒼耳來歲未知還爾熟
百口且留終歲儲貧交強半倉無穀

送元老西歸

畫錦西歸及早秋十年太學為親留讀詩俛就當年說

答策甘從下第收莫嫌簿領妨為學從此文章始自由
家有吏師遺躅在當令耆舊識風流

伯父仕宦四十年當時號為吏師

蜀人舊食決明花耳潁川夏秋少菜崇寧老僧教
人并食其葉有鄉人西歸使為父老言之戲作

秋蔬舊採決明花三嗅馨香每嘆嗟西寺衲僧并食葉
因君說與故人家

諸子將築室以畫圖相示三首

還家卜築初無地隨分經營似有時多斫脩篁終未忍

略存古栢更無疑畫圖且作百間計入室猶應三歲期
得到安居真老矣一生歌哭任於斯

舊廬近已借諸子新宅分甘臨老時萬里松楸終獨往
四方兄弟亦何疑竹間疏戶幽人到林上長松野鶴期
已覺高軒慙衛賜可憐黃犬哭秦斯

積因得果通三世臨老長閑自一時久爾觀心終未悟
偶然見道了無疑南遷北返吾何病片瓦尺椽天與期
自斷此生今已矣世間何物更如斯

題韓駒秀才詩卷

唐朝文士例能詩
李杜高深得到希
我讀君詩笑無語
恍然重見儲光羲

秋社分題

天公閔貧病雨止得豐穰
南畝場功作東家社酒香
分均思孺子歸遺笑東方肯
勸拾遺佳休嫌父老狂

釀重陽酒

風前隔年麴甕裡
重陽酒適從臺無餽
飲歎不濡口秋

嘗日已迫收拾煩主婦仰空露成霜寒庭菊將秀金微
火猶壯未可多覆筇唧唧侯鳴聲涓涓報初溜輕巾漉
糟脚寒泉養罌在誰來共嘉節但約鄰人父生理正艱
難一醉陶衰朽他年或豐餘此味恐無有

中秋無月同諸子二首

風雨來無定泥塗日向深直埋今夜月真失衆人心雲
外天衢淨人間濁霧侵幽人久不寐起坐夜悵悵

其二

卷衣換斗酒欲飲月明中坐看浮雲合遙憐四海同

舊說

中秋陰晴四海同之

清光知未泯來歲尚無窮且盡樽中渌高眠

聽雨風

予昔在京師畫工韓若拙為予寫真今十三年矣

容貌日衰展卷茫然葉縣楊生畫不減韓復令作之以記其變偶作

白髮蒼顏日日新丹青猶是舊來身百年迅速何曾住
方寸空虛老更真一幅蕭條寄衰朽異時髣髴見精神

近存八十一章注從道老聃門下人

九日獨酌三首

府縣嫌吾舊黨人鄉鄰畏我昔黃門終年閉戶已三歲
九日無人共一樽白酒近令沽野店黃花旋遣折籬根
老妻也說無生話獨酌油然對子孫

故國忘歸懶問人新居斫竹旋開門菊生牆下不知節
酒滴床頭初滿樽漲水驟來真有浪浮雲卷去自無根
凡心漫作潁濱傳留與他年好事孫

平昔交遊今幾人後生誰復款吾門
茅簷適性輕華屋黍酒忘形敵上樽
東圃旋移花百本西軒恨斫竹千根
舍南賴有凌雲栢父老經過說二孫

古栢孫何
僅所種

泉城田舍

泉城欲治麥禾困五畝鄰家肯見分
莫問三吳朱處士似勝吾鄉楊子雲
陰晴卒歲闕憂喜豐約終身看逸勤
家世本來耕且養諸孫不可恥鉏耘

樂城後集卷四

欽定四庫全書

集部

樂城後集卷五至七

詳校官庶吉士臣胡鈺

檢討臣何思鈞覆勘

總校官進士臣朱鈐

校對官助教臣胡予襄

謄錄監生臣劉醴潤

欽定四庫全書

樂城後集卷五

宋 蘇轍 撰

雜文一十二首

和子瞻沉香山子賦

并引

仲春中休子由於是始生東坡老人居於海南以沉香山遺之示之以賦曰以爲子壽乃和而復之其詞曰

我生斯晨閱歲六十天鑿六竇俾以出入有神居之漠然靜一六為之媒聘以六物紛然馳走不守其宅光寵所眩憂患所迫少壯一往齒搖髮脫失足隕墜南海之北苦極而悟彈指太息萬法盡空何有得失色聲橫騫香味並集我初不受將爾誰賊收視內觀燕坐終日維海彼岸香木爰植山高谷深百圍千尺風雨摧斃塗潦齧蝕膚草爛壞存者骨骼嶢然孤峯秀出巖冗如石斯重如蠟斯澤焚之一銖香蓋通國王公所售不顧金帛

我方躬耕日耦沮溺鼻不求養蘭茝棄擲越人髡裸章甫
奚適東坡調我寧不我悉久而自笑吾得道迹聲聞在
定雷鼓皆隔豈不自保而佛是斥妄真雖二本實同出
得真而喜操妄而慄叩門爾耳未入其室妄中有真非
二非一無明所廛則真如窟古之至人衣草飯麥人天
來供金玉山積我初無心不求不索虛心而已何廢實
腹弱志而已何廢強骨毋令東坡聞我而咄奉持香山
稽首仙釋永與東坡俱證道術

和子瞻歸去來詞

并引

昔予謫居海康子瞻自海南以和淵明歸去來之篇
要予同作時予方再遷龍川未暇也辛巳歲予既還
潁川子瞻渡海浮江至淮南而病遂沒於晉陵是歲
十月理家中舊書復得此篇乃泣而和之蓋淵明之
放與子瞻之辯予皆莫及也示不逆其遺意焉耳

歸去來兮歸自南荒又安歸鴻乘時而往來曾奚喜而
奚悲曩所惡之莫逃今雖歡其足追蹈天運之自然意

造物而良非蓋有口之必食亦無形而莫衣苟所賴之
無幾則雖喪其亦微吾駕非良吾行弗奔心游無垠足
不及門視之若窮挹焉則存俯仰衡茅亦有一樽既飯
稻與食肉撫簞瓢而愧顏感烏鵲之夜飛樹三遠而未
安有父兄之遺書命卻掃而閉關知物化之如幻蓋捨
物而內觀氣有習而未忘痛斯人之不還將築室乎西
廡堂已具而無桓歸去來兮世無斯人誰與游龜自閉
於床下息眇綿乎無求閱歲月而不移或有為子深憂

解刀劔以買牛拔蕭艾以為疇蓬累而行捐車捨舟獨
棲棲於圖史或以佞而疑丘散衆說之糾紛忽冰潰而
川流曰吾與子二人取已多其罷休已矣乎斯人不巧
惟知時時不我知誰為留歲云往矣今何之天地不吾
欺形影尚可期相冬廩之億秭知春壘之耘耔視白首
之章數信稚子之書詩若妍醜之已然豈復臨鏡而自
疑

潁州擇勝亭詩

并引

子瞻為汝陰守以幄為亭欲往即設不常其處名之
曰擇勝為作四言一章轍愛其文故繼之云

我嗟世人誰實與謀生伏其廬死安于丘既成不化寔
若繫囚我行四方所見或不江海之民生託于舟前炊
釜鬻後鑿匣澠晝設豆觴夕張衾裯出入濤瀾歸宿汀
洲與風皆行與水皆浮坐食網罟以魚去留居無四隣
行無朋儔胡貊之民駕車以游外纏毳韋內輯貂麋
水薦草驅馬縱牛逐射兎鹿聚爬薪糗食肉飲水雨雪

相咻草盡水乾風卷雲收所至成羣不懷一畝今我柰
何橫自綢繆翼為華堂湧為層樓繚以脩垣貫以通溝
勢窮物變何異一漚棄之不忍徙去莫由矧茲士夫汎
焉周流如鶯巢春知不期秋脩椽高棟徒與民仇一日
安居百年怨尤我兄和仲塞剛立柔視民如傷有急斯
周視身如傳苟完不求山磐水嬉習氣未瘳豈以吾好
而俾民憂頽尾甚清湖曲孔幽風有翠幄雨有赤油匪
舟匪車亦可相攸民曰公來庶幾無愁乎

和子瞻次韻陶淵明停雲詩

并引

丁丑十月海道風雨儋雷郵傳不通子瞻兄和陶淵
明停雲四章以致相思之意輟亦次韻以報

雲跨南溟南北一雨瞻望匪遙檻穽斯阻夢往從之引
手相撫笑言未半捨我不佇晚稻欲登白露霄濛人飲

嘉平漿酒如江

雷人以十月臘祭
凡三日飲酒作樂

我獨何為觀成于窻

此心了然來無所從欣然而笑是無枯榮手足相依所
鍾則情情忘意消神疑不征可以安身可以長生跋扈

飛揚誰匪南柯運歷相尋憂喜雜和我游其外所享則多削迹拔木其如予何

和子瞻次韻陶淵明勸農詩

并引

子瞻和淵明勸農詩六章哀憺耳之不耕予居海康農亦甚惰其耕者多閩人也然其民甘於魚鰕蟹鰕故蔬果不毓冬溫不雪衣被吉貝故蓺麻而不績生蠶而不織羅紈布帛仰于四方之負販工習於鄙朴故用器不作醫奪於巫鬼故方術不治予居之五年

凡羈旅之所急求皆不獲故亦和此篇以告其窮庶
或有勸焉

我遷海康實編于民少而躬耕老復其真乘流得坎不
問所因願以所知施及斯人我行四方稻麥黍稷果蔬
蒲荷百種咸植糞溉耘耔乃後有穡爾獨何為開口而
食掇拾于川搜捕于陸俯鞠婦子仰薦昭穆閭乘其輸
載來逐逐計無百年謀止信宿我歸無時視汝長久孰
為沮溺風雨相耦築室東臯取足南畝后稷為烈夫豈

一手斲木陶土器則不匱績麻繰蠶衣則可冀樂餌具
前病安得至坐而告窮相視徒愧莫為之先冥不謂鄙
一夫前行百夫具履以為不信出視同軌期爾十年風
變而美

沐老圖贊

老聃新沐晞髮于庭其心泊然若遺其形夫子與回見
之而驚入而問之強使自名曰豈有他哉夫人皆然惟
役於人而喪其天其人苟亡其天則金四支百骸孰為

吾纏死生終始孰為吾遷彼赫赫者將為吾溫肅肅者
將為吾寒一溫一寒交而萬物生焉物皆賴之而况吾
身乎溫為吾和寒為吾堅忽乎不知而更千萬年葆光
志之夫非養生之根乎

香城順長老真贊

并引

長老順公昔居圓通從先子游數日耳頃予謫高安
特以先契訪予再三予嘗問道於公以搐鼻為荅予
即以偈謝之曰搐鼻徑參真面目掉頭不受別鉗鎚

公領之紹聖元年予再謫高安而公化去已逾年矣
其門人以遺像示予焚香稽首而贊之曰

與訥皆行與璉皆處於南得法為南長子成就緇白可
名為老慈愍黑闇可名為姥我初不識以先子故訪我
高安示搐鼻語再來不見作禮縑素向也無來今亦奚
去

自寫真贊

心是道士身是農夫悞入廊廟還居里閭秋稼登場社

酒盈壺頽然一醉終日如愚

六祖卓錫泉銘

并引

六祖初住曹溪卓錫泉湧清涼滑甘贍足大衆逮今數百年矣或時小竭則衆汲于山下今長老辯公住山四歲泉日湧溢衆嗟異之聞之作銘曰

祖師無心心外無學有來叩者雲湧泉落問何從來初無所從若有從處來則有窮初住南華衆集須水水性融會豈有無理引錫指石寒泉自冽衆渴得飲如我說

法云何至今有溢有枯泉無溢枯蓋其人乎辯來四年
泉水洋洋烹煮濯漑飲及牛羊手不病汲肩不病負匏
勺尾盂莫知其故我不求水水則許我訊于祖師其亦
可哉

代李樵卧帳頌

并引

子瞻在黃日以卧帳遺李樵以頌問曰問李巖老何
心居此愛護鐵牛障闌佛子樵不能答紹聖二年九
月訪予高安戲代荅之

鐵牛正卧佛子正渴奪我與爾是天人業為我害爾是地獄業安卧此間我爾休歇茲大寶帳為降魔設

夢齋頌

并引

曇秀上人遊行無定予兄子瞻作夢齋二字名其所至居室為作頌云

法身充滿處處皆一幻身虛妄所至非實我觀世人生非實中以寤為正以寐為夢忽寐所遇執寤所遭積執成堅如丘山高若見法身寤寐皆非知其皆非寤寐無

非遨遊四方齋則不遷南北東西法身本然

抱一頌

并引

道士朱元經舊居光州彭城曹九章演甫少年過光
元經謁之演甫曰聞君未嘗求人今求我何故元經
曰君後自當知之後若干年演甫知光州復見元經
元經知黃白術演甫每問之元經不答曰有抱一法
君不問我問此何用演甫在光而元經蛻去演甫為
治後事此元經昔見演甫之意也崇寧甲申歲予閑

居潁川演甫之子煥為我道此因采道書中語作抱
一頌此非獨道家事乃瞿曇正法也

真人告我晝夜念一行一坐一眠一食一子若念一一
亦念子子不念一一則去子子若得一萬事皆畢饑而
念一一與子糧渴而念一一與子漿寒而念一一與子
裳病而念一一與子方鬪而念一一與子兵念一之至
至於忘一忘一之至與一為一與一為一入火不然入
水不溺是謂念一

樂城後集卷五

欽定四庫全書

樂城後集卷六

宋 蘇轍 撰

孟子解二十四章

子少作此解後失其本近得之故錄於此

梁惠王問利國於孟子孟子對曰王何必曰利亦有仁義而已矣先王之所以為其國未有非利也孟子則有為言之耳曰是不然聖人躬行仁義而利存非為利也惟不為利故利存小人以為不求則弗獲也故求利而

民爭民爭則反以失之孫卿子曰君子兩得之者也小人兩失之者也此之謂也

齊宣王問曰文王之囿方七十里有諸孟子對曰於傳有之周雖大國未有以七十里為囿而不害於民者也意者山林藪澤與民共之而以囿名焉是以芻蕘雉兔者無不獲往不然七十里之囿文王之所不為也

孟子曰以大事小者樂天者也以小事大者畏天者也樂天者保天下畏天者保其國小大之相形貴賤之相

臨其命無不出於天者畏天者知其不可違不得已而從之樂天者非有所畏非不得已中心誠樂而為之也堯禪舜舜禪禹湯事葛文王事昆夷皆樂天者也

齊景公作君臣相說之樂其詩曰畜君何尤孟子曰畜君者好君也君有逸德而能止之是謂畜君以臣畜君君之所尤也然其心則無罪非好其君不能也故曰責難於君謂恭陳善閉邪謂之敬吾君不能謂之賊

孟子學於子思子思言聖人之道出於天下之所能行

而孟子言天下之人皆可以行聖人之道子思言至誠無敵於天下而孟子言不動心與浩然之氣凡孟子之說皆所以貫通於子思而已故不動心與浩然之氣誠之異名也誠之為言心之所謂誠然也心以為誠然則其行之也安是故心不動而其氣浩然無屈於天下此子思孟子之所以為師弟子也子思舉其端而言之故曰誠孟子從其終而言之故謂之浩然之氣一章而三說具焉其一論養心以致浩然之氣其次論心之所以

不動其三論君子之所以達於義達於義所以不動心
也不動心所以致浩然之氣也三者相須而不可廢孟
子曰我善養吾浩然之氣其為氣也至大至剛以直養
而無害則塞于天地之間是何氣也天下之人莫不有
氣氣者心之發而已行道之人一朝之忿而鬪焉以忘
其身是亦氣也方其鬪也不知其身之為小也不知天
地之大禍福之可畏也然而氣之不養者也不養之
氣橫行於中則無所不為而不自知於是有進而為勇

有退而為怯其進而為勇也非吾欲勇也不養之氣盛而莫禁也其退而為怯也非吾欲怯也不養之氣衰而不敢也孔子曰人之少也血氣未定戒之在色及其壯也血氣方剛戒之在鬪及其老也血氣既衰戒之在得一人之身而氣三變之故孟子曰志一則動氣氣一則動志夫志意既修志盛奪氣則氣無能為而惟志之從志意不修氣盛奪志則志無能為而惟氣之聽故氣易致也而難在於養心孟子曰我四十不動心而告子先

我不動心告子曰不得於言勿求於心不得於心勿求於氣不得於心勿求於氣可不得於言勿求於心不可何謂也告子以為有人於此不得之於其言勿復求其有此心不得之於其心勿復求其有此氣夫言之不然而心則然者有矣未有心不然而氣則然者也故曰不得於心勿求於氣可不得於言勿求於心不可由是言之氣者心之使也心所欲為則其氣勃然而應之心所不欲而強為之則其氣索然而不應人必先有是心也

而後有是氣故君子養其義心以致其氣使氣與心相
狎而不相難然後臨事而其氣不屈故曰志至焉氣次
焉志之所至而氣從之之謂也昔之君子以其眇然之
身而臨天下言未發而衆先喻功未見而志先信力不
及而勢與之者以有是氣而已故曰志氣之帥也氣體
之充也養志以致氣盛氣以充體體充而物莫敢逆然
後其氣塞於天地雖然心之所以不動者何也博學而
識之強力而行之卒然而遇之有自失焉故心必有所

守而後能不動心之所守不可多也多學而兼守之事
至而有不應也是以落其枝葉損之又損以至於不可
損也而後能應故孔子謂子貢曰賜也汝以予為多學
而識之者歟曰然非歟曰非也予一以貫之北宮黶之
養勇也曰吾無辱於爾也孟施舍之養勇也曰吾無懼
於爾也無辱勇矣而未見所以必勇也無懼而後能必
勇故曰北宮黶之守氣不如孟施舍之守約北宮黶似
子夏孟施舍似曾子曾子之所以自守者曰自反而不

縮雖褐寬博吾不憊焉自反而縮雖千萬人吾往矣夫
縮入也入受也自反而心受之以為可為者無憾於吾
心也則吾心囂然為之而吾氣勃然應之矣孟子曰其
為氣也配義與道無是餒也行有不慊於心則餒矣夫
餒不充之謂也有行於此而義不受則心不慊心不慊
則氣不能充體氣不能充體之謂餒矣故心不能不動
也而有待於義君子之所由達於義者何也勉強而行
之則勞苦而失其真放而不之求則終身而不獲孟子

曰必有事焉而勿正心勿忘勿助長也夫君子之於道朝夕從事於其間待其自直而勿強正也中心勿忘待其自生而勿助長也而後獲其直強之而求其正助之而望其長是非誠正而誠長也迫於外也子夏曰百工居肆以成其事君子學以致其道待其自至而不強是學道之要也

孟子曰我知言詖辭知其所蔽淫辭知其所陷邪辭知其所離遁辭知其所窮何謂也曰是諸子之病也孟子

之於諸子非辯過之知其病而已病於寒者得火而喜
以為萬物莫火若也病於熱者得水而喜以為萬物莫
水若也一惑於水火以為不可失矣誠得其病未有不覺
而自泣也彼其為是險詖之辭者必有以蔽之而不能
自達也為是淫放之辭者必有以陷之而不能自出也
為是邪辟之辭者必有以附之而不能自解也苟能知
之發其蔽平其陷解其離未有不服者也不服則遁遁
必有所窮要之於所窮而執之此孟子之所以服諸子

也

孟子曰仁者如射射者正己而後發發而不中反求諸己夫射之中否在的而所以中否在我善射者治其在我正立而審操之的雖在左右上下無不中者矣顏淵問仁孔子曰克己復禮為仁一日克己復禮天下歸仁焉請問其目曰非禮勿視非禮勿聽非禮勿言非禮勿動夫居於人上而一為非禮則害之及於物者衆矣誠必由禮雖不為仁而仁不可勝用矣此仁者如射之謂

也

龍子曰貢者較數歲之中以為常樂歲粒米狼戾多取之而不為虐則寡取之凶年糞其田而不足則必取盈焉故曰治地莫善於助莫不善於貢貢者夏后氏之法也而其不善如此何也曰何特貢也作法者必始於麓終於精篆之不若隸也簡策之不若紙也車之不若騎也席之不若牀也俎豆之不若盤盂也諸侯之不若郡縣也肉刑之不若徒流杖笞也古之不為此非不智也

勢未及也寢於泥塗者寘之於陸而安矣自陸而後有
藁秸自藁秸而後有莞簟捨其不安而獲其所安足矣
方其未有貢也以貢為善矣及其既貢而後知貢之未
善也法非聖人之所為世之所安也聖人者善因世而
已今世之所安聖人何易焉此夏之所以貢也

陳仲子處於於陵齊人為廉孟子曰仲子所居之室伯
夷之所築歟抑亦盜跖之所築歟所食之粟伯夷之所
種歟抑亦盜跖之所種歟人安能待伯夷而後居而後

食若是則孟子之責人也已難曰否居於於陵而食其食非孟子之所謂不可而仲子之所謂不可也仲子以兄之祿為不義之祿而不食也以兄之室為不義之室而不居也天下無伯夷仲子之義為不居且不食也天下不可待伯夷而後居而後食然則非其居於於陵食於辟廬之果污也而不食於母避兄之室之不可繼也故曰以母則不食以妻則食之以兄之室則不居以於陵則居之是尚為能充其類也乎君子之行為可充也

為可繼也然後行有類若仲子將何以繼之故曰禦人
於國門之外而餽以道則不受以不義取之於民而餽
以道則受於孔子以不義取之於民者猶禦也其受於
孔子何也曰以其非禦也非禦而謂之禦充類至義之
盡也君子充其類而極其義則仲子之兄猶盜也仲子
之兄猶盜也則天下之人皆猶盜也以天下之人皆猶
盜而無所答則誰與立乎天下故君子不受於盜而猶
盜者有所不問而後可以立於世若仲子者蚓而後充

其操也孔子曰鳥獸不可與同羣吾非斯人之徒與而誰與蓋謂是也

學者皆學聖人學聖人者不如學道聖人之所是而吾是之其所非而吾非之是以貌從聖人也以貌從聖人名近而實非有不察焉故不如學道之必信孟子曰君子深造之以道欲其自得之也自得之則居之安居之安則資之深資之深則取之左右逢其原是以君子欲其自得之也

孟子曰天下之言性者則故而已矣所謂天下之言性者不知性者也不知性而言性是以言其故而已故非性也無所待之謂性有所因之謂故物起於外而性作以應之此豈所謂性哉性之所有事也性之所有事之謂故方其無事也無可而無不可及其有事未有不就利而避害者也知就利而避害則性滅而故滅矣故曰故者以利為本夫人之方無事也物未有以入之有性而無物故可以謂之人之性及其有事則物入之矣或

利而誘之或害而止之而人失其性矣譬如水方其無事也物未有以參之有水而無物故可以謂之水之性及其有事則物之所參也或傾而下之或激而升之而水失其性矣故曰所惡於智者為其鑿也如智者若禹之行水則無惡於智矣禹之行水也行其所無事也如智者亦行其所無事則智亦大矣水行於無事則平性行於無事則靜方其靜也非天下之至明無以窺之及其既動而見於外則天下之人能知之矣天之高也星

辰之遠也吾將何以推之惟其有事於運行是以千歲之日可坐而致也此性故深淺之辨也

孟子嘗知性矣曰天下之言性者則故而已矣故者以利為本知故之非性則孟子嘗知性矣然猶以故為性何也孟子道性善曰無惻隱之心非人也無羞惡之心非人也無辭讓之心非人也無是非之心非人也惻隱之心仁之端也羞惡之心義之端也辭讓之心禮之端也是非之心智之端也人信有是四端矣然而有惻隱

之心而已乎蓋亦有忍人之心矣有羞惡之心而已乎
蓋亦有無恥之心矣有辭讓之心而已乎蓋亦有爭奪
之心矣有是非之心而已乎蓋亦有蔽惑之心矣忍人
之心不仁之端也無恥之心不義之端也爭奪之心不
禮之端也蔽惑之心不智之端也是八者未知其孰為
主也均出於性而已非性也性之所有事也今孟子則
別之曰此四者性也彼四者非性也以告於人而欲其
信之難矣夫性之於人也可得而知之不可得而言也

遇物而後形應物而後動方其無物也性也及其有物則物之報也惟其與物相遇而物不能奪則行其所安而廢其所不安則謂之善與物相遇而物奪之則置其所可而從其所不可則謂之惡皆非性也性之所有事也譬如水火能下者水也能上者亦水也能熟物者火也能焚物者亦火也天下之人好其能下而惡其能上利其能熟而害其能焚也而以能下能熟者謂之水火能上能焚者為非水火也可乎夫是四者非水火也水

火之所有事也奈何或以為是或以為非哉孔子曰性相近也習相遠也夫雖堯桀而均有是性是謂相近及其與物相遇而堯以為善桀以為惡是謂相遠習者性之所有事也自是而後相遠則善惡果非性也孔子曰上智與下愚不移故有性善有性不善以堯為父而有丹朱以瞽瞍為父而有舜以紂為君而有微子啓王子比干安在其為性相近也曰此非性也故也天下之水未有不可飲者也然而或以為清冷之淵或以為塗泥

而告人曰雖是亦有可飲之實信矣今將指塗泥而告人曰吾將飲之可乎此上智下愚之不可移也非性也故也

孟子曰伯夷聖之清者也伊尹聖之任者也柳下惠聖之和者也孔子聖之時者也孔子之謂集大成集大成也者金聲而玉振之也金聲也者始條理也玉振之也者終條理也始條理者智之事也終條理者聖之事也智譬則巧也聖譬則力也以巧喻智以力諭聖何也巧

之所能有或不能力之所嘗至無不至也伯夷伊尹柳
下惠之行人之一方也而以終身焉故有不可得而充
至於孔子可以速而速可以久而久可以仕而仕可以
處而處然後終身行之而不匱故曰由射於百步之外
其至爾力也是可常也其中非爾力也是巧也是不可
常也巧亦能為一中矣然而時亦不中是不如力之必
至也

語曰齊人饋女樂季桓子受之三日不朝孔子行孟子

曰孔子從而祭腊肉不至不稅冕而行二者非相反也
孔子之去魯為女樂之故也去於腊肉之不至為君也
於其君之有大惡也孔子有不忍行也於其君之無罪
也孔子有不安行焉曰上以求免吾君下以免我是以
去於腊肉之不至曰是可以辭於天下也故曰乃孔子
則欲以微罪行不欲為苟去君子之所為衆人固不識
也

孟子曰君子不亮惡乎執必信之謂亮孔子曰君子貞

而不亮要止於正而不必信而後無所執否則執一而廢百矣

孟子曰存其心養其性所以事天也天壽不貳脩身以
踐之所以立命也天者莫之使而自然者也命者莫之
致而自至者也天畀我以是心而不能存付我以是性
而不能養是天之所以受我者有所不事也壽則為之
天則廢之天壽非人所為也而冥力焉是命有所未立
也修身於此知天壽之無可為也而命立於彼矣

孟子曰莫非命者順受其正何謂也天之所以受我者盡於是矣君子修其在我以全其在天人與天不相害焉而得之是故謂之正忠信孝弟所以為順也人道盡矣而有不幸以至於大故而後得為命巖墻之下是必壓之道也桎梏之中是必困之道也必壓必困而我蹈之以受其禍是豈命哉吾所處者然也人之為不善也皆有愧恥不安之心小人惟奮而行之君子惟從而已之孟子曰無為其所不為無欲其所不欲如斯而已矣

孟子曰舜為天子臯陶為士瞽叟殺人臯陶則執之舜則竊負而逃於海濱吾以為此野人之言非君子之論也舜之事親烝烝乂不格姦何至於殺人而負之以逃哉且天子之親有罪議之孰謂天子之父殺人而不免於死乎

孟子曰形色天性也惟聖人然後踐形形色者所強於外也中雖無有而猶知強之孟子以是為天性也有人於此其進之銳也則天下以為不速退矣是不然勉強

而力行之則其進也必銳不勝而怠厭之則其退也必速曷不取而覆觀之於其不可已而已者無所不已於其所厚者薄無不薄也故曰仲子不義與之齊國而不受人皆信之是舍簞食豆羹之義也人莫大焉亡親戚君臣上下而可是所謂不可已而已者也能居於陵食於辟廬而不顧而不能以不義不受齊國是所謂進銳而退速者也

孟子曰不仁而得國者有之矣不仁而得天下者未之有也孟子之為是言也則未見司馬懿楊堅也不仁而得天下也何損於仁仁而不得天下也何益於不仁得國之於得天下也何以為異君子之所恃以勝不仁者上不愧乎天下不愧乎人而得失非吾之所知也

孟子曰人能充其無欲害人之心而仁不可勝用也人能充無穿窬之心而義不可勝用也無欲害人之心與無穿窬之心人皆有之然苟將充之則未可以言而言

可以言而不言猶未免乎穿窬也此所謂造端乎夫婦
而其至也察乎天地也歟

樂城後集卷六